



續漢文獻通考鈔

物異輿地

十三



內閣文庫	
番號	漢 2433
冊數	20 (18)
函號	294 17

政書八景

共二十



續文獻通考鈔卷之二十二

古燕 羅 森約齋定

雲間 王 沂元翰著

秦郵 孫宗彛孝則鑒


廣陵 李 蘅杜若正

物異考

水災

宋理宗淳祐十三年秋七月辛丑大水冒城郭漂室廬人民死者以萬數

王氏曰按宋史言嚴衢發信台處建劍邵九郡同日大水冒城郭漂室廬人民死者以萬數徐清叟言唐五行志云取財過度則陰火其節而水溢今日國課所入未免增直取贏而商賈告病此又



淺草文庫
史以甲子仁鈔

張 洵湘芷閱
史繼曾孝直較

水之所由應也。

金宣宗貞祐二年六月潮白河溢漂古北口鐵裹關門至老王谷
元世祖中統十四年六月十二日杭州颶風大雨潮入城堂與可通舟
楫。

文宗至順元年閏七月平江嘉興湖州松江三路一州大水壞民田三
萬六千六百餘頃被災者四十萬五千五百餘戶杭州常州慶元紹興
鎮江寧國等路望江銅陵長林寶應興化等縣水沒民田一萬三千五
百餘頃大都保定大寧益都屬縣水。

順帝至元三年六月衛輝淫雨至七月丹沁二河泛漲與城西御河通
流平地深二丈餘漂沒人民房舍田禾甚衆民皆棲于樹木郡守僧家
奴以舟載飯食之移老弱居城頭日給糧餉月餘水方退汴梁蘭陽尉
氏二縣歸德府皆河水泛溢黃州及衢州常山縣皆大水。

至正八年五月庚子廣西山崩水湧灘江溢平地水深二丈餘屋宇人
畜漂沒壬子寶慶大水乙卯錢塘江湖溢比八月中高數丈餘沿江民
皆遷居以避之。

明太祖洪武九年丙辰京城水溢百官乘船以朝。

憲宗成化十四年八月江北大水漂沒田廬倒塌城郭巡按范珠奏請
停徵罷役除豁被災地方夏秋稅糧上命所司知之。

世宗嘉靖元年七月二十五日南京大風雨拔木毀屋大江水高丈餘
漂覆舟船浮屍無數。

穆宗隆慶二年七月台州颶風大作海潮泛溢天台諸山水合衝台州
府城溺死人民三萬餘口衝決田地一十五萬餘畝蕩析廬舍五萬餘
區三日乃退。

神宗萬曆十年壬午秋七月丙辰朔十三日戊辰至次日巳巳蘇松諸

續文獻通考卷之二十二
郡大風雨拔木江海及湖水俱嘯湧常州常熟崇明嘉定吳江等處漂沒室廬人畜

王氏曰按實錄嘉靖元年壬午秋七月乙巳朔二十四日戊辰至次日巳巳大風雨江海嘯湧漂沒室廬人畜亦如之以余所見及野史所載是日俱有龍虎之異前壬午禍微輕而遠後壬午禍甚慘而狹要之六十年內所無也

水異

宋孝宗乾道四年順昌縣槎溪祥雲彌布天大雨至田間水隨雲湧上高三十餘丈東流百餘丈皆澄潭視之蒼然有神物變化其中恭帝德祐二年錢塘江潮三日不至時元人分駐江沙上杭人方幸之而潮汐不至

遼聖宗太平五年三月魚兒濼有聲如雷其水一夕越沙岡四十里別

為一陂

金衛紹王大安元年徐沛界黃河清五百餘里幾二年以其事詔中外臨洮人楊珪上書曰河性本濁而今反清是水失其性也正猶天動地靜使當動者靜當靜者動則如之何其為災異明矣且傳曰黃河清聖人生假使聖人生恐不在今日又曰黃河清諸侯為天子正當戒懼以消災變而復誇示四方臣所未喻宰相以為妖言議誅之慮絕言路詔大興路鎖還本管

宣宗貞祐二年六月黃河自陝州界至衛州八柳樹清十餘日纖鱗皆見

順帝至正二十年十一月汴梁原武滎澤二縣黃河清二十一年十一月河南孟津縣至降州垣曲縣二百里河清七日新安縣亦如之十二月冀寧路石州河水清至明年春冰泮始如故二十四年夏衛

輝路黃河清。

甲辰六月十三日夜四更松江近海去處潮忽驟至人皆驚訝以非正候至辰時潮方來乃知非潮也後湖溲人說湖溲不通潮忽平湧起高三四丈若潮漲之勢正與此時同又平江嘉興亦如之。

王氏曰五行志水自盈主兵興乾坤變異錄河水大湧臣下執政有背叛。

明太祖洪武五年河南黃河竭行人可涉。

景皇帝景泰二年辛未春正月戊午南京禮部奏山川壇醴泉見却之穆宗隆慶六年五月南直隸龍目井化為酒。

神宗萬曆十九年荊州府公安縣六月二十五日大雨如注四晝夜時有巨蛇形如牛紅頭黑身長一二丈身出水湧往來馳突須臾堤崩陷為淵。

火災

宋理宗嘉熙元年夏五月臨安大火自巳至酉燒民廬五十三萬士民上書咸訖濟王之寃。

王氏曰按宋史時臨安火三日乃息詔求直言帝又諭輔臣曰近來早朝多奏臣下辭免等細事而事體大者乃從繳進甚非臨朝聽政之意自今宜就早朝面奏。

遼興宗重熙十八年十二月慶陵林木災。

金衛紹王大安三年三月戊午大悲閣災延燒萬餘家火五日不絕宣宗與定二年六月京師屢火遣禮部尚書楊雲翼禱之。

元定宗三年戊申野草自焚牛馬十死八九民不聊生。順帝至正二十八年六月甲寅大都大聖壽萬安寺災是日未時雷雨中有火自空而下其殿脊東鰲魚口火焰出佛身上亦火起帝聞之泣。

下亟命百官救護唯東西二影堂神主及寶玩器物得免餘皆焚燬
明成祖永樂十九年夏四月庚子奉天華蓋謹身三殿災
英宗正統十四年己巳夏六月丙辰謹身奉天華蓋三殿災遂及奉天
諸門是夜二鼓大雷電烈風雨自謹身殿火起御史呂昌劾守備豐城
侯李賢及府部諸司法應逮治上宥之

孝宗弘治十一年戊午冬十月十一日夜清寧宮災李廣伏誅先是廣
請卽萬歲山建毓秀亭及災衆皆謂建年月不利犯坐殺向太歲所致
大學士徐溥李東陽等上疏云近年以來災異頻仍內府火災尤甚
或以爲天道茫昧變不足畏此乃慢天之說或以爲天下太平患不
足慮此乃悞國之言或以爲齋醮祈禱爲弭災此乃邪妄之術或以
爲縱囚釋罪爲修德此乃姑息之計熒惑聖聽莫此爲甚且賄賂公
行賞罰失當紀綱廢弛賢否混簡工役繁興軍民困憊下情不達上

情不宣怨嗟之聲上干和氣災異之積正此之由

十二年己未闕里先師廟災

武宗正德九年甲戌春正月乾清宮災

世宗嘉靖十五年甲午夏六月十三日南京太廟災

先是申時分大風雨電雷後殿西南角火起前殿西北角火起遂延
燒殿宇東西廡廊神庫等處共一百三十二間其金銀祭器等藏于
後殿庫內冠頂袍服等藏于前殿厨內盡燬時南京守備太監李瓚
及禮部尙書湛若水以聞世宗大恐禮部尙書夏言疏請修省從之
二十年辛丑夏四月初五日夜雷電風雨忽仁廟火起遂及成祖廟太
廟昭穆群廟俱延燬獨睿宗廟存下詔罪已大赦天下
二十六年十一月宮中火傳詔速赦楊爵爵在獄七年至是得歸富平
有大鳥集其舍遂卒

三十六年夏四月丙申晡時雷雨至戌時火起奉天謹身華蓋三殿文武二樓午門奉天門俱災辛丑有事于郊廟社稷詔天下二十二日舉祀高玄大典止封停刑百官修省五日

四十四年三月大明門內西千步廊火上諭曰昨火處乃文積近地他日纂修所賴當預計之宮監左丞掖曰正德十六年以來內外題奏及番文計八十三萬二千餘本俱貯六科廊其千步廊所積乃先朝遺疏已經纂修者上然之

神宗萬曆十三年五月初七日慈寧宮災

二十四年三月初九日乾清宮火災

二十五年七月湖廣巡按趙文炳奏澧州安鄉縣地方二月二十二日烏鴉群聚啣絮裹火燒民房四百餘戶

二十八年陝西撫臣賈待問奏慶陽府雕嶺巡檢司地方于正月十八

日卯時天陰黑暗如夜有兩時分迅雷怪鳴二次西北邊從天落下一火塊其形大如碌軸三尺餘光照四方又兩時分墜地

火異

遼太宗會同元年三月虎官楊單赴乾寧軍為滄州節度使田武名所圍高模翰與趙延壽聚義往救有火光自模翰目中出縈繞旗矛焰如流星久之模翰喜曰此天贊之祥也遂進兵殺獲甚衆

金太祖初伐遼師次唐括帶幹甲之地諸軍襍射介而立有光如烈火起于人足及戈矛之上人以為兵祥明日至扎只水光復如初後果克敵

衛紹王大安二年十一月京師民周修武宅前渠內火出高二丈焚其橋板又旬日大悲閣幡竿下石隙中火出高二三尺人近之即滅凡十餘日自是都城連夜燔蕪二三十處

元順帝至正十三年三月彰德路西南有火自天而下如在城外覓之無有。

明武宗正德七年壬申春三月二十三日山東文登縣火起桑樹樹燔而枝葉無損先是秦始皇廟中鍾鼓無故自鳴頃之桑樹火廟宇皆爲瓦礫而神像顏色不改是日流賊數萬破文登。

世宗嘉靖末豫章鐵樹宮忽有着緋人從天乘雲而下坐宮之上始一童子見之數日闐闐聞人無不見者又數日火無故自發宮爲灰燼。

神宗萬曆十四年保定府一街市磚壁內忽出火三日夜方息。

十六年正月京草廠內巡夜軍見鼓樓內火龍飛上草梁次夜又見一大蝦蟆在草梁上臥口啣一火毬又鍾樓內一火龍飛出草梁上隨雲起六梁俱焚上亦不寃蓋先是夢火神告知故也。

二十八年八月二十七日河南懷慶府河內縣天鼓自西北而來聲如

雷飛降一星大如升隨帶火光墮本縣常平鎮北二里掘之尺許獲一石外黑如鐵中白如銀形小而甚重非金非石人不可識時姚思仁巡按河南因上疏其略謂中原八郡實爲天下樞機比年水潦爲災蝗蝻肆虐閭閻愁歎近復奉旨採金使者四出群聚烏合號召狼貪四民之忿盈襟兩河之怨滿腹以致上干天怒星隕鼓鳴乞召回開採之使大加賑貸庶可消災沴爲福澤。

木異

宋高宗紹興十八年六月侯官縣有竹實如米饑民採食之。

理宗淳祐九年祠山廟戟門前桂樹上花一簇十有四莖莖間五葉狀如紅梅。

遼太宗會同五年十一月武定軍奏松生棗。

聖宗統和十二年三月涿州木連理。

金宣宗興定四年華州渭南縣民裴德寧家伐樹破其中有赤色大字表裏脗合有司言與唐大曆中成都瑞木有文天下太平者其事頗同蓋太平之兆也乞付史館

元順帝至正辛卯夏松江普照寺僧舍一敞帚開花又嘉興儒學闈人陶氏磨上木肘發青條開白花又吳江分湖里煨工一柳樹椿以安鐵礎者且十餘年矣發長條數莖如葦三家雖有此怪而皆無恙實關係國家之氣數

明成祖永樂四年議建北京工部尚書宋禮取材於蜀得大木若干於馬湖府計庸萬夫力刊除過路出之一夕木忽自行達于坦途所經聲吼如雷巨石爲開度越巖阻膚寸不損百工顧視謹謹踴躍事聞廷臣稱賀上遣官致祭封其山爲神木山

孝宗弘治八年乙卯春二月長沙府枯竹開花實如麥米楓樹生李實

黃連樹生黃瓜苦蕒菜開蓮花七日而凋時巡撫右副都御史徐恪以聞上曰弭災之道在修人事事關朕身的當自舉行爾兩京文武群臣各處鎮巡三司等官尤當痛加修省勉盡職務共回天意毋事虛文

草異

宋孝宗淳熙中太平州郊產異麻若靈芝人以爲祥

寧宗嘉定十七年興國學宮池瑞蓮生駢花並實

遼太祖二年八月幽州進合歡瓜

金衛紹王至寧元年宣宗彰德故園竹開白花如鷺鷥藤俄而入繼大統

元文宗政和五年禁中芭蕉連理

順帝至正丙申丁酉間揚州兵火之餘城中屋址遍生白菜大者重十五斤小者亦不下八九斤有斨力人所負纔四五顆耳

明太祖洪武五年壬子夏六月嘉瓜生于句容張穀賓家圃雙實同蒂
禮部尚書陶凱以獻

英宗正統八年冬十一月殿上生荆棘高二尺

穆宗隆慶五年四月浙江杭州府栗樹生桃

穀異

宋高宗紹興十五年郡守晁謙之言臨川禾登九穗足爲瑞應乞宣付
史館

理宗景定元年福建提學李伯玉奏建陽縣嘉禾生一本十五穗繪圖
來上詔皇太子始封于建允爲上瑞其以建陽爲嘉禾縣

度宗咸淳四年秋七月溫州禾異畝同穎

遼穆宗應曆二年九月朔雲州進嘉禾四莖二穗

金熙宗皇統四年正月陝西進嘉禾十有二莖莖皆七穗進自正月生自七八月

宜宗興定元年四月陳州進瑞麥一莖四穗開封府進瑞麥一莖三穗

二莖四穗七月大社壇產嘉禾一莖十五穗十月丹州進嘉禾異

畝同穎

元世祖至元元年十月恩州進嘉禾一莖九穗

二十四年八月濟州進瑞麥一莖九穗

仁宗延祐四年七月南城產嘉禾一莖十二穗

順帝元統時唐山民岳瑞園禾有一莖雙穗者有一本十三穗者

明太祖二十八年秋九月壬辰朔北平永清衛之龍門生嘉禾異莖同

穗其三餘合爲一仍爲三穗者二二餘合爲一仍二穗者六是歲太熟

時成祖封北平命歛之遣使來進太祖喜親御翰墨爲詩一章以賜成

祖

世宗嘉靖八年秋八月初十日萬壽節時總督倉塲兼理西苑戶部右

侍郎劉體乾以瑞禾獻三穗者四本二穗者九十六本閣臣徐階等表賀

始興令楊應隆邠州人言其遠祖掘地種竹忽地中鑿然有聲得一石甕發之有物數百個長三寸餘見其上下膚如穀形去膚熟之直是大米香美異常後食者壽皆百二三十歲飲其汁者壽亦八九十嘗讀藏經云太古之世穀長五六寸人壽皆數百歲又圖經稱崑崙之墟有木禾食者得上壽豈其餘粒耶劉子敦令保昌與楊令接壤甚驩得之最詳

芝草朱草

宋理宗紹定元年漳州龍江書院仰高堂產瑞芝九莖色如截肪金世宗大定五年六月河南府進芝草十三本得於芝田石上薦之大廟甲辰大安殿楹產芝其色如玉

哀宗天興初荆王守純府第產肉芝一株高五寸許色紅鮮可愛既而枝葉津流濡成血臭不可聞剝而復生者再未幾長子訛可出質守純及宗室皆死青城

元世祖至元元年十二月當陽覆船山產芝一本五幹高五尺幹皆兩岐相倚附瓊琦如珊瑚枝其高者結爲華蓋慶雲狀

八年芝產武安文廟大成殿金色九莖叩之有金玉聲

大德五年冬十二月興元西鄉縣進芝一本色如珊瑚六年正月鄒平縣進芝一本五枝五葉色皆赤

至大四年芝生國學大成殿延祐二年二月芝生大成殿五年七月芝生大成殿又生於工部中書之屋梁一本七幹

明世宗嘉靖三十六年冬十月玄岳諸山獻仙芝一千四百十本巡按馬思臧獻二十本河南巡撫潘恩獻二十三本南畿御史耿定向獻三

十本

四十五年有芝生于太廟第三室乃睿宗初廟也因命名玉芝宮

金異

遼太宗神册元年將稱尊號改元掘地為壇得金鈴因名其地曰金鈴岡

元世祖至元壬午杭州張存于番中獲聖鐵一塊厚廣僅及二寸作法撒沙布地噙鐵于口刀刃不能傷其身有烏馬兒奉使來取試以鐵納於羊口籠其首作法撒沙驗之劍果無所傷去鐵復揮應手首落遂就進呈

明太祖洪武八年庫錢庫銀飛或曰此陰盛陽微之徵時南臺民家屋上有錢豎立瓦上各貫以竹或得一二十文皆庫錢也

穆宗隆慶六年七月七日華亭縣東見雲端有一物甚巨火引前後色紅有人隨之色稍淡而黃轟轟有聲向東而飛至八團某寺外墮地八尺餘乃鐘也有鑄時年月云自閩省來者夫金石至重有時而飛亦奇怪事

玉石異

元丞相伯顏嘗至于闐國鑿井得一玉佛高三四尺色如截肪照之皆見筋骨脈絡即貢上方

至正二十八年慶元奉化州南山石笑開其碎而大者有山川人物禽鳥草木之形

明太祖洪武十二年胡惟庸宅井中忽生石筍漸長出水碍汲使人取之筍傍復出三枝次年惟庸以謀逆誅

三十一年庚辰

即建文二年

春正月辛酉朔凝命神寶成先是建文君在儲宮時嘗夢神人致上帝命授以重寶及元年使者還自西方得青玉於

雪山踰二尺質理溫粟及二年春正月建文君郊祀宿齋宮夕夢若有
覩乃驚寤遂命玉人琢之爲大璽至是成寶方一尺六寸九分賜命凝
命神寶其文曰天命明德表正萬邦精一執中宇宙永昌

歲凶

宋理宗嘉熙四年正月臨安大饑奪食于路市中殺人以賣盜於隱處
掠賣人以微利日未晡路無行人

王氏曰按宋史詔賑恤貧民時馬光祖知榮王與芮府有積粟
三往見之王以他辭光祖乃臥于客次王不得已見焉光祖厲
聲曰天下誰不知儲君爲大皇子今民饑欲死不以此時收人
心乎王以廩虛辭光祖探懷中出片紙曰某庄某舍若干語
塞遂許以三十萬光祖遣吏分給活饑民甚衆

金衛紹王崇慶二年京兆饑斗米至八千錢

元武宗至大元年春正月浙東西饑紹興慶元台州廣德建康鎮江六
路饑死者三萬六千餘饑戶四十六萬有奇

文宗天曆元年十二月陝西饑人相食庚午撫州饑有田之家盡室
殍死

順帝至正十二年大名饑饑民七十一萬六千九百八十口
十八年春莒州蒙陰縣大饑斗米金一斤京師大饑人相食彰德山東
亦如之

憲宗成化二十年秋七月河北燕南諸省大饑分遣大臣賑恤
世宗嘉靖十五年湖廣大饑巡按張彙繪圖爲說以獻請賑貸從之

疫癘

金哀宗天興元年五月汴京大疫凡五十日諸門出死者九十餘萬人
貧不能葬者不在是數

地震

遼聖宗太平二年三月地震雲應二州屋摧地陷鬼白山裂數百步泉湧成流

金海陵正隆五年二月陝西河東地震時問司天馬貴中等曰何爲地震中等曰伏陰逼陽所致又問震而大風何也對曰土失其性則地以震風爲號令人君嚴急則有烈風及物之災

元世祖至元二十一年九月京師地震

王氏曰按傳云陽伏而不能出陰迫而不能升于是有地震世祖問李冶賢召問昨地震如何冶對曰天裂爲陽不足地震爲陰有餘夫地道陰也陰太盛則變常今之地震或奸邪在側或女謁盛行或讒慝交至或刑罰失中或征伐驟舉五者必有一于此矣夫天之愛君如愛其子故示此以警之耳苟能辨奸邪去女謁屏讒

佞省刑罰慎征討上當天心下協人意則可以轉咎爲休矣帝嘉納之

成宗元貞九年四月大同地震有聲如雷壞廬舍五千八百壓死者一千四百餘人懷仁縣地裂二所湧水盡黑其一廣十八步深十五丈其一廣六十六步深一丈

明太祖洪武五年秋七月十七日戌時建康地震大雷震死男女十六人太祖曰此由禁網疎闊遺漏者多故天助朕殺之時坑戮有司官吏已至三四萬人云

憲宗成化元年二月襄陽地震轟轟有聲時天雨黑黍

二十一年春三月泰山屢震先是二月丁巳四鼓微震三月壬午朔四鼓大震入夜復震丙戌四鼓復震甲午乙未相繼震庚子連震二次有司以聞時椒寢漸繁上頗有易儲意而未卽行內臺奏言泰山震動應

在東宮上大驚遂止。

孝宗弘治八年九月南京地震。冬十一月陝西貴州地震。

嘗考是年二月洮州雨霜六月黔縣雨豆七月大雨電八月貴州地震九月廣東潮瓊颶風暴雨十月南京地震南贛大疫十一月貴州陝西地震十二月靖魯衛天鼓鳴長沙江西大震電禮部以聞上令兩京文武羣臣同加修省直言無隱於是南京戶部主事胡燿上疏言地震之數災之小者也西北旱疫父子相食東南饑疫骨肉流離大變也陛下深居九重左右蒙蔽未之知耳今李廣揚鵬引用劉良輔輩左道惑亂聖心齋醮費財差遣在外如虎橫行吞噬無厭士大夫昏夜乞哀於宮宦貴戚交相賄托不以爲耻言官有所舉劾瞻前顧後苟且塞責如小吏徐珏忠義敢言陛下誤聽奸臣之愬置之於法御史王槐依阿罪之陛下所以奉行天地之事羣臣所以奉行陛

下之事者如此陰盛陽微災異曷由以弭乞用臣言則奸佞斥而陰

慝消矣疏入人爲懼危之未幾廣輩果以賍敗

胡燿字仲元蕪湖人

世宗嘉靖三十四年十二月山西陝西河洛同時地震蒲州等處尤甚或地裂泉湧或城房屋陷入地中或平地突成山阜或一日連震數次或累日震不止河渭泛華岳終南山鳴或移數里河清數日壓死奏報有名官吏軍民八十二萬有奇致仕南兵書韓邦奇光祿卿馬理祭酒王維禎同日死焉其不知名未及經奏報者復不可勝計

三十九年竹谿縣地震出血

山崩

宋度宗咸淳元年天目山崩

元成宗大德十一年三月道州營道縣暴雨山裂百二十餘處

仁宗延祐二年夏四月成紀縣山移是夜疾風電雹北山南移至夕河

續文獻通考卷之二十一
川次日再移平地突出土阜高者二三丈陷沒民居
順帝至正十二年十月霍州趙城縣霍山崩湧石數里前三日山鳴如
雷禽獸驚散

明憲宗成化十六年六月長樂縣平地起小阜人畜踐之輒陷明年尋
湧起一高山占者云武后時曾有此異乃女王爲男之兆時裕陵宮人
萬氏冊爲貴妃每侍宸遊戎服男飾以從此其應與

世宗嘉靖二十六年十二月十四日陝西澄城縣麻陂山界頭嶺晝夜
大吼如雷至二十七日夜山忽中斷百丈移走東西三里南北五里

穆宗隆慶四年八月浙江湖州府山崩成湖

神宗萬曆二十七年九月狄道山崩成坑更於平地湧出大小山五座

地陷

明世宗嘉靖四十二年北京觀象臺忽崩陷時雷尙書禮覓臺四圍並
無餘土更不知土從何去三日後訪知臺土移填於城外某潭潭且夷
矣

穆宗隆慶二年樂亭縣地名劉下庄地裂一處寬一尺長三丈又迤東
地裂一處寬一尺長一丈又地名揚鑿坵地裂一處寬一尺長三丈各
湧黑沙水出

地生異物

金哀宗正大七年十二月新衛北三里許有影在沙上如舊城衛州城
狀寺塔宛然數日乃滅

明憲宗成化十三年二月甲午浙江山陰縣地忽湧泉如血高尺餘
世宗嘉靖三十七年浙江東陽縣民張思齊家地裂五六處各湧血如
線高尺許凝爲片人就食之掘地無所見撫按上狀

青雘青祥

明神宗萬曆二十九年忽見昭應寺藏經閣上大小瓦獸共六個各口吐青氣一道冲天半時方散

赤青赤祥

元順帝至正五年四月鎮江丹陽縣紅霧草木葉及行人衣裳皆濡成五色

二十一年昆明縣玉案山下產赤小犬色如火羣吠遍野

黃青黃祥

明穆宗隆慶元年四月京師黃塵四塞三月癸亥黃霧四塞

白青白祥

金世宗大定五年六月地生白毛二十年五月京師地生黑白毛

二十二年五月地生白毛二十九年五月地生白毛

元仁宗皇慶元年丁卯雨毛二年八月黃梅縣天雨毛

明憲宗成化二十一年春正月甲申朔申刻有火自中天西墜化白氣復曲折上騰聲如雷踰時復有大星赤色自中天西行近濁尾跡化白氣曲曲如蛇形久之如雷震地

黑青黑祥

金宣宗貞祐四年正月旦黑霧四塞乃散

元世祖至元七年四月壬午檀州隕黑霜

仁宗延祐七年十月六日甲子先一夕因晉邸入繼大統告祭太廟之頃陰風北來殿上燭燈皆滅良久方息蓋攝祭官鐵失也先帖木兒等皆弑君之元惡也

順帝至正十二年荆門天雨黑雪

十三年春正月二十三日黑氣亘天雷雹以雨有物若果核與雨雜下五色間錯光瑩堅固破其實食之似松子仁人皆曰婆娑樹子至閏月

續文獻通考卷之二十一
十二日復雨三月十八日杭州亦雨如湖州郡人初不以爲意及九月十日紅巾犯省治兩核之地悉被兵火屋宇如故二十六日湖州陷儀鳳橋四向焚戮特甚雨時橋四向視宅處獨多後聞池州亦然池州之禍尤慘

十六年正月二十三日日入時平江在城忽望東南方軍聲且漸近驚走覘視他無所有但見黑雲一簇中彷彿皆類人馬而前後火光若燈燭者莫知其筭迤邐由西北方而沒惟葑門至齊門居民屋脊龍腰悉揭去屋內牀榻屏風俱仆醋坊橋董家雜貨舖失白米十餘石醬一缸不知置之何地

十七年正月己丑杭州降黑雨河地水皆黑
十八年七月乙亥京師黑霧昏瞶不辨人物自旦近午始消如是者旬有五日

明太祖洪武十年丁巳春正月丁酉夜雨黑水如墨汁池水皆黑浙江金華處州諸境皆有之占云黑靄露下天下寃

憲宗成化十二年丙申秋七月庚戌京師黑靄見兼旬始息是靄也黑而小金睛修尾狀類犬狸先從西城北隅起時坊巷細民家男女夜多露宿忽見有物負黑氣一片而來或自戶牖入雖密室亦無不至至則人昏迷或手足或頭臉或腹背皆被傷傷亦不甚痛人莫敢言數日遍城驚擾入夜家操刃張燈自防更有黑氣來輒鳴金擊鼓以逐之巡城御史以聞一日上御奉天門侍衛忽驚起兩班遂喧亂上欲起太監懷恩按之頃之乃定

穆宗隆慶六年四月浙江省城黑霧中一物蜿蜒如車輪目光掣電水電隨之瓦屋皆震林中鳥雀擊死無筭

恒雨

宋寧宗嘉定十一年六月浙西大霖雨至十五年十六年亦然
元順帝至正十九年岳州大雨經八十日

明神宗萬曆十五年蘇松等處自五月六月七月久雨禾黍花荳悉皆
淹沒

二十八年七月十八日至二十二日興化莆田等縣大雨連作五晝夜
城垣橋梁堤岸傾圮殆盡福安連江等處亦大雨三晝夜官舍民廬塌
潰者十之七八

天雨異物

遼道宗咸雍四年六月西北路雨穀方三十里
金世宗大定十六年二月戊申雨豆於臨潢之境其形銳而赤食之味
頗苦

哀宗天興三年正月己酉京索之間雨血十餘里是時蔡城陷金亡

元世祖至元二十四年諸王薛徹都部雨土七晝夜没死牛畜

成宗元貞二年處州天雨米黑色

仁宗皇慶元年六月丁卯雨毛

順帝元統二年正日庚寅朔河南省雨血是日衆官晨集忽聞燔柴煙
氣既而黑霧四塞咫尺不辨腥穢逼人逾時方息及行禮畢日過午驟
雨隨至霑洒聖墻及衣裳皆赤

至正元年礪嘉縣天雨鐵民舍山石皆穿人物遇之皆斃

十二年湖廣雨粉針民家門戶壁柱之間有粉痕如針樣無數

二十五年五月甲子京師雨毫長尺許如馬鬃或言于帝曰龍鬚也命
拾而祀之

六月戊申京師雨魚時大雨魚隨雨而落長尺許人取而食之

明憲宗成化十三年夏六月京師雨錢



續文獻通考卷之二十二
孝宗弘治庚戌三月陝西慶陽府雨石無數大者如鵝鴨卵小者如鷄頭實皆作人語說長短

世宗嘉靖六年丁亥五月甲子京師雨錢

甘露

明太祖洪武二年巳酉冬十月甲戌膏露降於乾清宮後苑蒼松之上光潤如酒凝結如珠肪白飴甘彌布松柯四年辛亥冬十月甘露降于鍾山沾潤草木瑩若凝脂美若醍醐五年冬十一月甘露又降越明年仍降如初

成祖永樂十七年巳亥十一月甘露復降于孝陵之松栢凡四日凝爲玉脂融爲瓊液粲若垂珠聯若編貝其芳香之氣甘美之味旁達莫可擬倫時仁宗爲太子監國遣人採獻成祖祇薦宗廟頒賜百官

憲宗成化六年庚寅春甘露降于郊壇松栢上親御齋宮取以賜百官大學士彭時翰林學士尹直撰甘露頌以進

世宗嘉靖九年庚寅冬十二月巳卯甘露降于顯陵守臣以聞明年正月辛卯上親製欽天記頌十七年春甘露降于承天皇帝陵之松樹時鎮守以賜各部大臣四十一年壬戌甘露降于承天皇帝陵之松樹時鎮守太監張方以獻世宗悅群臣稱賀仍遣成國公朱希忠往承天祭告陵寢其承天守分叅議及知府太監各賞銀有差

恒暘

遼穆宗應曆十二年五月旱命左右以水相沃頃之果雨十六年正月以歲旱泛舟於池禱雨不雨舍舟立田中禱乃雨十七年四月射柳祈雨復以水沃羣臣

元順帝至元二年蘄州黃州浙東衢州婺州紹興江東信州江西瑞州等路及陝西皆旱是年四月黃州黃岡縣周氏嬪產一男卽死狗頭人

身咸以爲旱魃云。六年夏廣東南雄路旱自二月不雨至于五月種不入土。至正二年彰德大同二郡及冀寧平晉榆次徐溝縣汾州孝義縣忻州皆大旱自春至秋不雨人有相食者衛輝亦大旱。

明太祖吳元年丁未夏六月久旱上日減膳素食宮中皆然既而大雨羣臣請復膳不許詔免今年田租。

世宗嘉靖元年久旱卽位日大雨霑足頃復開霽觀者皆慶爲中興之兆。

恒燠

明武正德七年冬燕趙河朔之地無雪而燠。

恒寒

遼天祚帝乾統二年三月大寒冰復合。九年七月隕霜殺稼。金章宗承安五年十月癸卯晨陰霜附冰至日入亦如之。

元世祖中統二年五月西京隕霜殺禾。三年五月宣德咸寧等路隕霜。

二十六年五月丁丑濟南棣州隕霜殺菽。二十七年七月大同平陽太原隕霜殺禾。

仁宗皇慶五年五月雄德歸信縣隕霜殺桑。

順帝至正二十三年八月鈞州密縣隕霜殺菽。

二十七年五月辛巳大同隕霜殺麥。

明武宗正德七年冬江淮風雪連旬南至洞庭緩流處冰厚尺餘。

水雹

宋理宗時吳昌裔論四陰證狀其略曰竊見立秋以來常陰爲沴先一日大雨雹越翼日暴風至淫雨不止至於旬時蚤禾壞於垂成晚稻傷於既穎豐稼之候轉而凶荒將恐害於黍盛無以供我軍實又聞天目

續文獻通考卷之二十一
一。帶洪浸漂流水冒近畿。是殆爲兵爲饑之證。占書曰。雨雹陰脅陽也。霍雨陽干陽也。方金火之交而厥罰常雨。此非陰盛陽微之兆乎。夫臣者君之陰也。妻者夫之陰也。小人者君子之陰也。□□者中國之陰也。且自聖上攬權之後。固無昔日擅命之臣。惟威令積弱。不能以運掉三邊。紀綱寢頹。不能以操制諸將。習强者方命怙寵者玩威。第功賞者多肆於誕誣。報軍書者輒輕於狎侮。偏裨擅離部伍。而不知有國法。士卒敢陵州縣。而不知有朝廷。積是弱形。漸不可長。此非將帥之權太盛乎。方國步艱難之日。正君心恐懼之時。而道路流言竊議聖德。謂宮廷宴飲頻爲過差。房闈妃嬪多著位號。知書近侍以竒功而移上意。私謁表民以險陂而通外交。甚至外廷之除授。或倚於幽陰。帥柄之請求。輒避於中。禁牽於柔道。職是厲階。此非女寵之謁太盛乎。端平人才之盛。譎然有小元祐之風。不一二年初意。漸變君子。則厭薄以爲無益。小人則

愛惜以爲有才。三凶囑托以潛歸。二孽覬覦而再起。不惟昔之所斥者復乘隙以求進。而今之所擯者亦旋踵而得遷。旁起多門。自塞正路。此非舊人復用之漸乎。韃□憑凌中夏。蓋非殘金之比。初犯蜀口。五郡爲墟。繼犯荆襄。十州如燬。將士征行而不得臥。婦子流徙而不得歸。欲戰則恐。事力之不强。欲和則慮。情款之未實。又況唐鄧均睦之寇。導之以扣江秦鞏松維之族。誘之以幹腹內外受敵。殊可寒心。此非□□竊發之證乎。凡此四端。是皆陰類。事形於下。則變見於天。證象孔昭。警戒甚至。陛下代天作子者也。所宜昭德塞違。以回渝怒之威。大臣佐理陰陽者也。所宜開誠布公。以消乖沴之氣。陽明勝則德性。用陰濁勝則物欲行。消長之機。正宜凜凜。今大昕坐朝。間有時不視事之文。私第謁假。或有時不入堂之報。上有耽樂陷逸之漸。下無協恭和衷之風。在內則嬖御懷私。以爲君心之蠹。在外則弟子寡謹。以爲朝政之累。游言噂沓。寵

賂彰聞欲以此鎖鑰群慝呼吸太和得乎昔建炎三年六月陰雨不止高宗罪已求言宰執引咎求去郎官以上皆許言朝政得失時中書舍人李陵以三陰之說應詔謂能制將帥之謂剛能抑宦寺之謂正御史中丞張守亦以三陰之說抗疏願嚴恭寅畏以脩其德更選任輔弼以脩其政上下動色祇畏明威卒扶炎精之光以基中興之盛皆自高宗君相一念抑畏中來也臣愚欲望陛下仰繩祖訓顧諟天明遠聲色嚴宦寺以清宅心之源進忠良斥姦回以公用人之柄申明典章以重御將之法謹固封守以嚴備敵之防而二三大臣各一乃心各和乃政通宮中府中爲一體毋使陟罰之異同合在邊在廷爲一家毋使細大之偏重如此君臣合德中外革心未有不轉災眚而休祥易陰蒙而陽霽天下事變亦當陰消潛弭而不足憂矣

金世宗大定十一年六月戊申西南路招討司必里海水之地雨雹三十餘里小者如雞卵其一最大廣三尺長丈餘四五日始消

元成宗大德十年四月鄭州管城縣風雹大如雞卵積厚五寸

武宗至大元年五月管城縣大雹深一丈無麥禾

英宗泰定元年七月龍慶路雨雹大如雞卵平地深三尺餘

順帝元統二年八月高郵寶應縣大雨雹是時淮浙皆旱惟本縣瀕河田禾可刈悉爲雹所害凡田之旱者無一雹及之

四年四月清州八里塘雨雹大過於拳其狀有如龜者有如小兒形者有如獅象者有如環玦者或長如卵或圓如彈玲瓏有竅色如雪而堅至正十一年四月彰德雨雹大者如斧時麥熟將刈頃刻忘失田疇堅如築塲無稽粒遺留者地廣三十里長百餘里樹木皆如斧所劈傷行人斃禽畜甚衆

二十八年二月汴梁雨水冰狀如樓閣人物冠帶鳥獸花卉百態具備

羽幢朱葆彌望不絕凡五日始解又十日復冰自汴至平樂皆然不一歲賊陷汴據之

明成祖永樂十二年十一月金水河及太液池冰凝只樓閣龍鳳花卉之狀奇巧特異上賜群臣觀之呂震以爲禎祥屢見率百官上表賀不許

憲宗成化八年七月丙午陝西隴州大風雨雹中有如牛者五長七八尺厚三四寸六日方消

世宗嘉靖五年七月朔江西南豐縣雹大如碗形如人頭萬全都司雹大如甌人地尺許

恒風

遼興宗重熙二十四年張孝傑及第詣佛寺忽迅風吹孝傑幞頭與浮圖齊墮地而碎有老僧曰此人必驟貴然亦不得其死後果如所言

天祚帝乾統六年王鼎宰漆水縣時憩於庭忽有暴風舉臥榻空中鼎無懼色但覺枕榻俱高乃曰吾中朝正士邪無干正可徐寘之須臾榻復故處風遂止

金衛紹王大安三年二月夜大風從西北來發屋折木吹清夷關折時有男子郝贊詣省言即位之後天變屢見火焚萬家風折門關非小異也宜退位讓有德有司問爾狂疾乎贊大言曰我不狂疾但爲社稷計宰相皆非其才每日省前大呼凡半月上怒誅之隱處

元太宗五年十二月大風霾凡七晝夜
順帝至正二十七年三月京師有大風起自西北飛沙揚礫昏塵蔽天逾時風勢八面俱至終夜不止如是者連日自後每日寅時風起萬窮爭鳴戌時方息至五月癸未乃止

明穆宗隆慶二年元旦大風飛沙走石白晝晦暝自京師達江浙皆然

恒陰

明太祖洪武十八年春二月久雨陰晦不解雪雹而雷遂詔中外百司凡軍民利病政事得失條陳以對下及編民卒伍苟有所見皆得盡言無諱

晝晦

元順帝至正十七年秋七月京師晝晦不辨人物自旦至午方消如是者旬有五日

王氏曰按王隱晉書曰日無光臣有陰謀京房易傳曰臣專刑茲謂分威蒙微而日不明

明景皇帝景泰六年春二月二十八日風作黃沙蔽日連晝晦暝至二月初八日既雨始霽先是二月二十八日清明後之二日旦時微風自西北來至辰刻漸大沙土溷然東驚其色正黃如柘染然土沾人手而

洒洒然如濕頃之天地晦暝色映窓牖間如血紅室中不辨人已而紅色漸黯黑至午未復黃稍開朗人相顧慘愕至三月二日微雨後忽黃氣四塞日色如青銅無風而雨土拂之如塵積地皆黃色昏益甚明日大雨時或紅黑至初六日始作東北風七日又雨八日始霽人心乃安

雷震

宋寧宗嘉定十四年正月地震大雷

彭龜年奏曰天之鼓舞萬物者雷風也君子鼓舞萬民者號令也天有雷風之變乃為人君號令之應雷為天地之動最為不測而難信者然發以二月收以八月人事候之以為節未嘗爽也故萬物因之以動蟄而無病焉若當收而發則誤物多矣陛下亦嘗因雷之非時而反求之號令之間乎陛下自即位以來好出御筆嗾黜之間多為不測若示人以聰明威斷者其慰人心者固時有之而動人心者亦

不少矣。抑思人君據天下之利勢，一喜一怒，係萬物休戚，而使人不可得而測，則人其能自安乎？當人情求安之時，而反使之不自安之意，殆非初政之美也。雷震不時應，或在是孟冬之月，六陰過盛，而謂之陽月者，以陰盛則衰陽當生爾。今淫雨為災，蓋陰勝也。推之人事，則君弱臣強，陰勝也。內侵外治，陰勝也。小人害君子，陰勝也。盜賊病平民，陰勝也。蠻口謀中國，陰勝也。陛下受天明命，大臣雖有翊戴之勲，而威福之柄實在陛下。前日大臣庇一大吏，出一臺臣，陛下覺之，罷大臣而進臺臣，已服陛下英斷。君弱臣強之病，宜無有也。陛下自在潛邸，不邇聲色，及登大位，親灑宸翰，以聲色酒為戒，既無所耽溺，亦無所牽制，內侵外治之患，宜無有也。惟是陛下思見太上朝夕，不忘而中間有阻絕，不得通求之愈切，持之愈固，使陛下彷徨無策，經營南內，將有移御之意。若果如此，陛下念親可謂至矣。然於宗廟

社稷之計，不審熟慮之否乎？此恐未免動陰勝之應也。天道雖遠，固未易知。人心非遙，氣到自見。自古未有不召而自至之災，亦未有已出而不應之變。陛下不可逆料，以為不然而忽之也。推之已事，亦可鑒矣。

理宗寶祐三年正月，迅雷時元夕，欲張燈，起居郎牟子才上疏言，倡優下賤，奇技獻笑，溲汗清禁，今震霆示威，願聖明覺悟，天意可回，乃罷元夕張燈。

宋季福州畫錦坊有賣米者，一夕雷震死，其家三人，大書屍上，凡九字，其文曰：元口月八，塵口月八，亘人不能識。有一老曰：但於其中直貫一畫，則成文矣。蓋謂米中用水糠，中用木查也。蓋賣米之家，實如是云。

元順帝至正二年，興國路永興縣雷震死糧房，貼書章尹于縣治，時方

大旱有朱書在其背云有旱却言無旱有災却道無災未庸藏厥渠魁且擊廷前小吏

二十年二月浙西諸郡震霆掣電雪大如掌頃刻積深尺餘

明太祖洪武十三年雷震謹身殿

武宗正德元年六月雷震正殿鳴吻太廟春獸天壇樹木禁門房柱俱摧折燒毀

世宗嘉靖十五年五月雷火灼謹身殿俱燼上令修省

御史何維栢言兩宮山陵之役費且數百萬是誠不可以已乃沙河之役以七百萬功德亦不下二百萬安南軍餉非二百萬不可臣恐聚歛者無所施其術而筭計者安所贍其需乞緩諸不經之費而并力兩宮安南之役慎于謀始則民安而天眷矣不報

穆宗隆慶元年八月大暑雷震次日大寒如嚴冬夜半雷霆達旦

物自鳴

金海陵正隆六年臨潢府聞空中有軍馬聲仰視見風雲杳靄神鬼甲兵蔽天自北而南仍有語促行者未幾海陵南征遇弒

世宗大定十三年八月策試進士於閔忠寺夜半忽聞音樂聲起塔上西達於宮考官完顏蒲提李晏等以爲文運始開得賢之兆

元順帝至正二十四年四月十五日華亭五保楊巷邵浦雲之西清庵廊屋一十九間每間屋柱皆有聲其聲如以桶覆水面而擊其底者人以手按之則振掉而起經時方止

王氏曰按乾坤變異錄人君宮室無故有聲主兵起若人家主家亡

明太祖洪武十一年處州遂昌縣奏有大聲如鐘自天而下無形或以爲鼓妖次年官民俱災

英宗天順七年二月晦夜空中有聲李賢上言傳云無形有聲謂之鼓妖上不恤民則有此異上命具寬恤事以進
物自壞

元順帝至正十一年岳州府門忽自倒柱脚向天

人異

宋寧宗慶元元年尤溪縣有陳油妻產二子肢體異而胸膈相連

陳升之將生母荆國夫人常聞排榻有聲者累日索之無所見既產升之其聲遂息得大蛇蛻于褥下鱗甲首尾俱備惟腹下脫一鱗升之既長腹亦有一鱗可磨指甲仕宋封秀國公

楊億之初生母章氏夢羽衣人自言武夷仙脫化既誕則一鶴雛也舉家警駭貯而棄之江其叔曰吾聞世之異人其生亦異如姜嫄有棄簡狄行契乃追至江濱開視之鶴已脫而嬰兒具焉體猶有紫毛

尺餘次日乃落

金世宗大定十三年正月尚書省奏宛平張孝善有子曰合得十二年三月旦死至夕復生云本是良鄉人王建子喜兒而喜兒前三年已死建駭以家事能具道之此蓋假屍還魂擬付王建爲子上曰若是則姦倖小人競生詐僞賣亂人倫止付孝善

元世祖中統二年九年河南民王四妻靳氏一產三男

王氏曰按唐志云物反常爲妖陰氣盛則母道壯也

成宗大德元年十一月遼陽打鷹孛蘭奚戶那懷妻和里迷一產四男十年正月江州湖口縣民方丙妻甘氏一產四男

泰定帝致和元年太平當塗縣楊泰妻吳氏一產四子

順帝至正元年祥符縣市中一丐婦忽生鬚

至正元年棗縣民張氏婦生男甫及週歲暴長四尺許容貌異常臍腹

擁腫見人輒嬉笑如世俗所畫布袋和尚云

明太祖洪武二十四年八月河南龍門有婦人司牡丹為夫職死越三

年同鄉袁馬頭死而復甦自言我司牡丹也召其家人驗之良是云死

後為薄姬廟侍婢今借屍還魂耳時懿文太子自陝還聞于上上召面

詢賜鈔帛還令兩家給養

憲宗成化十八年三月鳳陽宿州民張真妻王氏孕當產臍下右邊痛

不可言歷三月一日腹右畔開裂產出一男甲辰徐州一婦脅骨生

一肉瘤漸長如核大皮益瑩薄彌月見從此產有司具聞月給膳米

世宗嘉靖二年雲南曲靖衛舍人胡晨妻產一男兩頭四手三足五

年禮部尚書席春奏有婦人產一子六月四面頭有角手足各一節獨

瓜鬼聲十一年貴州巡按奏軍人李華妻劉氏生男兩頭四手

二十八年己酉大同右衛舍人馬錄女年十七歲變為男子

穆宗隆慶二年秋山西男子李原雨有兄原雲兄弟二人原雨初娶張

氏夫婦不相能因黜其妻同一夥伴業農一日偶腹痛甚遂臥床久之

陽漸微渠亦自異以為病虛故又久之則月行始知變為婦人矣

神宗萬曆庚寅南宿州村民婦一產七子膚髮紅白黑青諸色各異以

為妖也潛屬一人瘞之江許是夜里有富長者夢神謂曰明日有七將

軍在阨過爾門宜救之當獲福祐長者起覘門外果見所識人抱一筐

衣覆其上呼而發視之問知其由因呼錢勞之語曰是兒神已托夢于

我我當鞠之爾但歸報已瘞勿洩也越三年婦老竟無子而思所瘞子

翁亦聞育在富長者家徧訪得之乃屬人懇求長者曰神以見屬我安

有還理于是與見而兩家子焉

王氏曰按雙生子曰孿子永樂靈丘縣民李文秀妻一產三男

天順間揚州有民婦一產五男顧連壁山東博興人與其弟合壁

俱一乳所生其母四乳生六子二女。成化間嘉善縣鄒亮妻初乳生三子再乳生四子三乳生六子。嘉靖間香山蓮塘民鄭七仔妻廣州河南民黃世綱妻萬曆間高平縣民吳守倉婦俱一產三男大同有一產四男者。

詩異

金章宗泰和八年有童謠云易水流汴水流百年易過又休休兩家都好任前後總成留至貞祐中舉國遷汴。元世祖初宋未下時江南謠言江南若破百馬來過當時莫喻其意及宋亡乃知指丞相伯顏也。

順帝至正五年淮楚間童謠云富漢莫起樓貧漢莫起屋但看羊兒年便是吳國家後明太祖定鼎于吳蓋童謠之應也。

十四年春城平江於古城基內得一碑其文云三十六十八子寅卯年至辰巳合收張翼同爲利不在常不在楊切須欸欸細思量且卜水莫問米浮圖倒地莫扶起修古岍重開河軍民拍手笑呵呵日出屋東頭鯉魚山上遊星從月裡過會在午年頭竟不曉所言何事或者以爲三十六四九也張翼巳午之交也張士誠第行九四而同首亂者適十八人也豈其然與。

訛言

元順帝至元二年民訛言朝廷拘刷童男女一特嫁娶殆盡。

胡粹中曰人必好色然後疑其淫人必貪財然後疑其盜訛言雖起於閭閻之小人亦在上者露其機括故因以發之耳當時順帝志荒而欲縱聲色之好不待哈麻進秘密而後肆也訛言其必有所自矣。

明英宗正統元年京師小兒會天旱祈雨口中群誦雨帝雨帝城隍雨

帝隨有土木之變。邲王以弟即位。蓋與弟之誣至此始驗。
世宗嘉靖三十四年十二月。浙直訛傳有物如蝴蝶。夜入人家。變幻飛走。禦之被傷。如瓜痕。民間鳴鑼擊鼓為防。或言是馬。祖師術官司捕馬道。亡不得尋。亦止息。

服妖

元世祖至元二十八年九月。命尙衣局織無縫衣。

毛蟲之異

遼穆宗應曆十八年六月。撻烈于鵬窠中得牝犬來獻。

金熙宗皇統三年七月。太原路進獬豸。

元太祖駐師西印度。忽有大獸。其高數丈。一角如犀牛。然能作人語。云此非帝世界。宜速還。左右皆震懾。獨耶律楚材進曰。此名角端。乃鹿星之精也。聖人在位。則此獸奉書而至。且能日馳萬八千里。靈異如鬼神。不可犯也。帝即回馭。

不可犯也。帝即回馭。

天台陶九成曰。稽之前志。神禹氏治水功成。天降飛兔。日行三萬里。而未嘗善言也。又后土鐵蹄之獸。至善言而未聞其獨角也。軒轅獲飛黃而獨角。漢武獲獸併角而五蹄。又未嘗聞其善言能走也。及聖祖誕膺天命。而角端出焉。夫一角者。所以明海宇之一萬八千里之涉者。所以示無遠弗届也。

順帝至正十年。彰德境內狼狽為害。夜如人形。入人家。哭就人懷抱中。取小兒食之。

明太祖洪武五年八月。河南民獻白兔。命放之野。

成祖永樂二年甲申秋九月丁未。周王以騶虞來獻。

是年八月。周王畋於鈞州。獲一獸。白質黑章。猊首虎軀。其狀孔威。不可迫視。王命部卒俟之。其性馴擾。因召詢父老。皆謂之騶虞。至是王

率其屬表獻闕下。

十一年癸巳五月騶虞見于山東曹縣六月丁未朔以獻白質黑章性仁而馴呂震請表賀上曰汝能效李沆爲人則善矣震退上顧侍臣曰震可謂不學無術者也。

宣宗宣德四年二月襄城伯李隆獻騶虞二云出滁州來安縣石固山素質黑文馴狎不驚上命群臣觀之胡濙等請上表賀上曰禎祥之興必有實德庶幾副之朕嗣位今四年中外所任豈皆得人民生豈皆得所騶虞之祥於德弗類唐太宗嘗曰堯舜在上百姓敬之如神明愛之如父母動作興事人皆樂之發號施行人皆悅之是大祥瑞朕與卿等宜共謹之若騶虞其免賀。

孝宗弘治十一年六月京師西直門有熊入城守衛者不覺馬文升謂野獸不宜入城乞嚴武備兵部郎中何孟春謂同列曰熊之爲兆旣當被盜亦宜慎火未幾城內在處有火災禮部焚旣而禁中亦火乾清宮焚或問孟春孟春曰予不曉占書曾記宋人紀紹興己酉永嘉災前數日有熊至城下州守高世則謂其倖趙允縉曰熊於字能火郡中宜慎火果延燒官民舍是年之語蓋憶此事而云耳不意亦驗。

世宗嘉靖三十七年胡宗憲進白鹿秋八月宗憲又進白鹿 三十九年秋宗憲又進白鹿。

神宗萬曆二十三年春三河縣民家母彘生八小豕內有一人形者手足俱備但頭額上止有一眼產下能行其家以爲不祥斃之占者謂豕生人或人頭豕身爲邊鄙不寧之兆。

麒麟

明成祖永樂十二年榜葛刺王表獻麒麟 十三年麻林國進麒麟呂震請表賀上曰翰林往日脩五經四書性理大全朕則許之麒麟有無

何所損益其已之

馬異

宋寧宗嘉定十三年華容鄧氏馬產龍駒事聞命有司立馬監於此以識其祥後又產于其隣

明成祖永樂十八年九月山東青州府諸城縣進龍馬縣馬嘗有牝于海濱者一口雲霧晦暝有物蜿蜒與馬接至是產駒鱗臆肉髮體具龍文其色青蒼蓋龍馬云

牛異

元順帝至正十年秋襄陽車城民家牛生犢五足前三後二
明世宗嘉靖五年河南南陽縣牛生犢一首兩身是年禮部尙書席春奏有牛產犢一身二首腹內心肺膽各二

羽虫之異

遼興宗重熙中劉仲爲崇義節度使政務簡靜致鳥鵲同巢之應

金熙宗天眷十五年七月有司進四足雀

明孝宗弘治十四年二月保定府臣獻白鴉以爲祥瑞禮部尙書傅潁劾其不當奏詔斥遣之

鳳凰

元順帝至正十一年廣西慶遠府有異禽雙飛見於述昆鄉飛鳥千百隨之蓋鳳凰云其一飛去其一留止爲獾人射死首長尺許毛羽五色有藏之以獻于帥府者久之其色鮮明如生云

雞異

宋度宗咸淳五年雞異生距

元順帝至正二十二年龍泉縣人家一雞二形一邊毛羽純雄一邊毛羽純雌能雄鳴又能雌伏

明孝宗弘治十四年春湖廣華容縣红柿村民劉福家雞生雛三足
世宗嘉靖四年長垣縣民王憲家雞抱卵內成人形耳目口鼻四肢皆
具

龍蛇之異

遼太祖神冊五年五月有龍戰于洩刺山陽水上上射獲之藏其骨於
府內

天顯元年七月次扶餘府城上見黃龍繚繞長可一里光耀奪目入于
行宮有紫黑氣蔽天逾日帝崩太宗改扶餘府爲黃龍府

金熙宗天眷元年夏見一蒼龍一瓜承一嬰兒兒爲龍所戲略無懼色
三日如故

元順帝至正二十七年六月皇太子寢殿新甃井成有龍自井而出光
焰燦人宮人震懾什於地又宮牆外長慶寺槐樹有龍纏擾其上良久

飛去樹皮皆剝

明憲宗成化初唐縣於水村人自京至完縣玉山店見二猪戲溝中頃
之入大石下隨率少年持挺移石視之時天大旱烟雲四起雷雨交作
識者知其爲龍也自是每旱移石輒雨垂四十年然移之不驗或以爲
龍移他去耳

蟲異

金章宗明昌四年六月邢洛深冀及河北西路十六謀克之地野蠶成
繭

元仁宗在潛邸日奉答吉太后駐輦懷孟時苦群蛙亂鳴終日不寐翼
旦太后命近侍傳旨諭之曰吾母子方憤憤蛙忽惱人耶自後其母再
鳴故今此地雖有蛙而不作聲

蝗螟

遼道宗壽隆四年七月南京蝗時蕭文知易州屬縣議捕除之文曰蝗乃天災捕之何益但反躬自責于是蝗盡飛去遺者亦不食苗散在草莽間爲鳥鵲所食

金世宗大定四年八月中都南八路蝗飛入京畿時完顏宗寧爲歸德軍節度使督民捕蝗得死蝗一斗給粟一斗數日捕絕

元世祖至元二十二年大都汴梁益都廬州河間濟寧歸德保定京師大蝗害稼

王氏曰按釋者謂蝗蟲有甲飛揚之類陽氣所生也恒陽則有介蟲之孽於春夏爲蝻今謂之蝗按劉歆云貪虐取民則蝻與魚同占

莫治至治二年汴梁祥符縣蝗有群鷺食之既而復吐積如丘垤

泰定宗四年五月洛陽縣有蝗五畝群鳥盡食之越數日又集鳥又食

之

元世祖至元二十七年四月夔州蝗害稼雷雨大作蝗盡死是年大有

王氏曰按漢志云溫而風則生螟蟥有螺蟲之孽

鼠妖

元世祖至元二十二年六月馬湖田鼠食稼殆盡總管祠而祝之鼠悉赴水死

順帝至正十五年湖廣群鼠數十萬越洞庭湖望四川而去

續文獻通考鈔卷之二十二

續文獻通考鈔卷之二十二

古燕 羅 森約齋定

史以甲子仁鈔

雲間 王 圻元翰輯

李 蘅杜若正

秦郵 孫宗彞孝則鑒

廣陵

陳輔世德修閱

史 奭壽平較

輿地考

北直隸古冀州之域

遼太祖以迭刺部之衆代遼輦氏起臨潢建皇都東併渤海凡城邑之
居百有三太宗立晉歸涿檀蘇順營平蔚朔雲應新媯儒武襄十六州
於是割古幽并管之地而跨有之遂以皇都爲上京升幽州爲南京改
南京爲東京厥後聖宗城中京興宗升雲州爲西京而五京脩焉又以
征伐俘戶建州襟要之地多因舊居名之加以私奴置頭下軍總京五

府六州軍城百五十有六縣二百有九部族五十有二屬國六十東至於海西至金山暨於流沙北至臚胸河南至白溝幅員殆萬里云金之壤地東極吉里迷兀的改諸野人之境北自蒲與路之北三十餘里火魯火曠謀克地爲邊右旋入泰州婆盧火所壕而西經臨潢金山跨慶桓撫昌淨州之地出天山外包東勝接西夏逾黃河復西歷葭州及米脂塞出臨洮府會州積石之外與生羌地相錯復自積石諸山之南左折而東逾兆州越監州堡循渭至大散關北並入山京北路商州南以唐鄧西南皆四十里取淮之中流爲界而與宋爲表裏襲遼制建五京置十四總管府是爲十九路其間散九節鎮三十六防禦郡二十二刺史邵七十三軍十州六縣六百三十二後復升軍爲州或十一城塞堡關百二十二鎮四百八十八此其可考也

元起朔漠併西域平西夏滅女直臣高麗定南詔遂下江南而天下爲一故其地北踰陰山西極流沙東盡遼左南越嶺表蓋漢東西九千三百二里南北一萬三千三百六十八里唐宋東西九千五百一十一里南北一萬六千九百一十八里元東西所至不下漢唐而西北則過之有難以里數限者立中書省一行中書省十有一曰嶺北曰遼陽曰河南曰陝西曰四川曰甘肅曰雲南曰浙江曰江西曰湖廣曰征東分鎮藩服路一百八十五府三十六州三百五十九軍四安撫司十五縣一千一百二十七漢唐極盛之際有不及焉唐以前以郡領縣而元則有路府州縣四等大率以路領州州領縣而腹裏或有以路領府府領州州領縣者其府與州又有不隸路而直隸省者至以戶爲差戶至四萬五萬者爲下州五萬至十萬者爲中州下州官五員中州六員凡爲中州者二十八下州者十五其中書省統山東山西河北之地謂之腹裏爲路二十九州八屬府三屬州九十一屬縣三百四十六

明洪武初設北平布政使司爲太宗文皇帝龍潛之地靖難後革北平布政使司建爲北京而定都焉統順天永平保定河間真定順德廣平大名八府通州昌平涿州霸州薊州灤州祁州安州易州景州滄州定州冀州晉州趙州深州開州延慶保安一十九州與大興等縣一百二十六而順天府則爲京兆郡至嘉靖二十九年以易州昌平州通州爲三輔各設經畧使

大都路 唐幽州范陽郡石晉割以獻遼會同五年升爲南京府曰幽都仍號盧龍軍開太元年更爲永安析津府以幽州當析木津也領順檀涿易蘇景六州析津宛平昌平良鄉潞安次永清武清香河玉河鄆陰十一縣順州領懷柔檀州領密雲行唐涿州領范陽新城固安歸義易州領易涿水容城薊州領漁陽三河玉田景州領遵化又共十四縣宋名燕山暫得而失金天會元年析河北爲東西路時

屬河北東路元貞元年定都以燕乃列國之名不當爲京師號遂改爲中都統府一節鎮三刺史郡九縣四十九其大興府初爲析津府後改名大興府領大興宛平安次鄆陰永清寶坻香河昌平武清良鄉十縣廣陽一鎮元太祖十年克燕初爲燕京路總管大興府世祖至元元年中書省臣言開平府闕庭所在加號上都燕京分立省部亦乞正名遂改中都九年改大都十九年置留守司二十一年置大都路總管府領院二縣六州十州領十六縣本朝洪武初改爲北平府永樂初改爲順天府領通州涿州霸州昌平薊州五州宛平大興固安東安香河武清寶坻三河密雲永清懷柔房山文安保定大城良鄉豐潤玉田平谷遵化鄆縣順義二十二縣

延慶州 唐爲媯川縣金爲涪山縣元至元三年省入懷來縣五年復置延祐三年割涪山懷來隸大都升晉山爲龍慶州領懷來一縣

本朝初州縣俱廢永樂十一年復置州改爲隆慶直隸京師隆慶元年改爲延慶領永寧一縣

順寧府 唐爲武州遼爲德州領宣德一縣金爲宣德州元初爲宣寧府太宗七年改山東路總管府中統四年改宣德府隸上都路至元三年以地震改順寧府領三縣二州本朝洪武四年州縣俱廢二十六年置萬全都指揮使司在宣府領衛十五守禦千戶所三堡五隸口北道其蔚州延慶左永寧保安四衛廣昌美峪二千戶所散建于各州衛

保安州 本唐新州石晉獻遼改奉聖州武定軍領歸化可汗儒蔚四州永興礬山龍門望雲四縣歸化州雄武軍領文德一縣可汗州清平軍領懷來一縣儒州縉陽軍領縉山一縣蔚州忠順軍領仙靈定安飛狐靈丘廣陵五縣金大安元年升爲府名德興領德興媯川

縉山望雲龍門礬山六縣永安一鎮元初因之領永興縉山懷來礬山四縣至元二年省礬山入永興三年省縉山入懷來仍改爲奉聖州隸宣德府五年復置縉山延祐三年以縉山懷來隸大都至元三年以地震改永安州領一縣本朝初州縣俱廢永樂中復置保安州直隸京師治雷家站

隆興路 唐屬新州地遼秦國大長公主建爲州金明昌三年復置刺史升撫州爲桓州支郡治柔遠鎮屬西京明昌四年置司候司承安二年陞爲節鎮軍名鎮寧撥西北路招討司所管四猛安隸之領柔遠集寧豐利威寧四縣元中統三年以郡爲內輔升隆興路總管府建行官領縣四州一本朝以其地同順寧府地俱析置萬全都指揮使司隸口北道山西分巡

永平路 唐爲平州遼爲盧龍軍又改興化軍領盧龍安喜塗都三

縣金天輔七年以燕西地與宋遂以平州爲南京天會四年復爲平州興平軍領盧龍撫寧海山遷安昌黎五縣元太祖十年改興平府中統元年升平灤路置總管府設錄事司大德四年以水患改永平路領縣四州一州領二縣本朝洪武二年改爲永平府屬北平布政司永樂中直隸京師領灤州一州遷安撫寧昌黎盧龍樂亭五縣保定路本清苑縣唐隸鄭州宋升保州金天會七年改順天軍隸河北東路貞祐二年改屬中都海陵賜名清苑滿城二縣元太宗十一年升順天路置總管府至元十二年改保定路設錄事司領司一縣八州七州領十一縣本朝洪武元年改爲保定府初屬北平布政司後直隸京師領祁安易三州清苑唐安肅定興博野慶都雄雋新城深澤束鹿高陽涑水滿城容城完新安一十七縣

真定路唐恒山郡又改鎮州宋爲真定府金爲鎮州成德軍節度

正隆間仍改府置本路兵馬都總管府轉運司領真定藁城平山灤城獲鹿行唐阜平靈壽元氏九縣元初置總管府領中山府趙邢洛磁滑相濟衛祈威完土州後割磁威隸廣平濟滑隸大名祁完隸保定又以邢入順德洛入廣平相入彰德衛入衛輝又以冀深晉蠡四州來屬縣九府一州五府領三縣州領十八縣本朝改爲真定府直隸京師領定冀晉趙深五州真定獲鹿元氏灤城靈壽藁城無極阜平井陘平山新樂行唐曲陽南宮棗強新河武邑武強安平饒陽栢鄉高邑寧晉臨城隆平贊皇衡水二十七縣

順德路唐邢州宋爲信德府金天會七年復改邢州仍置安國軍節度領邢臺唐山內丘平鄉任縣沙河河南和鉅鹿八縣道武新店蔡村團城四鎮元初置元帥府後改安撫司憲宗分洛水民戶之半於武道鎮置司總管五年以武道鎮置廣宗縣併以來屬中統三年升

順德府至元元年以洛州磁州來屬二年洛磁自爲一路以順德爲
順德路總管府領縣九本朝洪武初改爲順德府屬北平布政司後
直隸京師領邢臺南和內丘平鄉廣宗沙河唐山鉅鹿任縣九縣
廣平路 唐洛州又爲廣平郡金天會七年以守邊置防禦使領永
年廣平宗城新安成安肥鄉鷄澤曲周洛水八縣臨洛新安平恩白
家灘四鎮元太宗八年置邢洛路總管府以邢磁威隸之憲宗二年
爲洛磁路止領磁威二州至元十五年升廣平路總管府領司一縣
五州二州領六縣本朝洪武初改爲廣平府屬北平布政司後直隸
京師領永年曲周肥鄉成安邯鄲廣平鷄澤威縣清河九縣
河間路 唐瀛州宋河間府金析河北爲東西路各置本路兵馬都
總管府以河間府爲河北東路統節鎮二刺郡五縣三十鎮三十五
領河間肅寧二縣元至元二年置河間路總管府領司一縣六州領

十七縣本朝洪武初改河間府屬北平布政司後改隸京師領景滄
二州河間獻阜城肅寧任丘交河青縣興濟靜海寧津吳橋東光故
城南皮鹽山慶雲一十六縣

大名路 唐魏州五代南漢改大名府宋爲北京魏郡金改安武軍
府一統刺郡三縣二十鎮二十正隆二年升大名爲總管府附近十
二猛安皆隸焉兼漕河事領元城大名魏冠氏南樂館陶夏津朝城
清平莘十縣安定安賢魏縣普通清水博寧桑橋南樂館陶孫生韓
張清平馬橋十三鎮元因舊名爲大名路總管府領司一縣五州二
州領六縣本朝洪武初改爲大名府屬北平布政司永樂初直隸京
師領開州一州元城魏縣南樂清豐東明內黃濬縣大名滑縣長垣
十縣

山東古兗州之域

元置山東東西道肅政廉訪司

明置山東等處承宣布政使司領濟南兗州東昌青州登州萊州六府置山東都指揮使司領濟南青州左登州大嵩濟寧東昌海寧靈山成山平山鰲山靖海安東威海萊州臨清十六衛東平肥城膠州諸城滕縣五所又置山東等處提刑按察司分濟南東兗海右三道兼察諸府州衛所布按二司俱治濟南都司初治青州後亦遷治濟南云

濟南路 唐濟州又改臨淄郡又改濟南郡又爲青州宋爲濟南府金因之領歷城臨邑商河章丘禹城長清濟陽七縣盤水中宮等三十六鎮元初改濟南路總管府舊領淄陵二州至元二年淄州割入淄萊路陵州割入河間路又割臨邑縣隸河間路長清縣入泰安州禹城縣隸曹州齊河縣入德州割淄之鄒平縣來屬置總管府領司一縣四州二州領七縣本朝復改爲濟南府領泰安武定德濱四州

歷城長山章丘禹城齊河鄒平淄川齊東濟陽新城臨邑長清肥城陵縣青城新泰萊蕪德平原陽信海豐樂陵商河蒲臺利津霑化二十六縣 齊東青城臨邑樂陵見北直隸河間路

萊州府 唐初改東萊郡爲萊州宋爲防禦州金升定海軍屬山東東路元初屬淄萊路舊設錄事司至元二年省入掖縣又省卽墨入掖與膠水仍隸般陽路領四縣本朝洪武九年陞爲萊州府領平度膠州二州掖縣濰縣昌邑高密卽墨五縣

登州府 唐初爲牟州復改登州宋屬河南道元屬般陽路領四縣本朝初屬萊州府洪武初改爲登州府領寧海一州蓬萊黃縣福山棲霞招遠萊陽文登七縣

東昌路 唐博縣宋隸河北東路金隸大名府元初隸東平路至元四年析爲博州路總管府十三年改東昌路仍置總管府領司一縣

六本朝改爲東昌府領臨清高唐濮三州聊城清平茌平棠邑冠縣博平莘縣丘縣館陶恩縣夏津武城觀城朝城范縣一十五縣隸山東布政司

兗州府 唐初升泰寧軍宋改襲慶府金改泰定軍大定十九年更名兗州領磁陽曲阜泗水寧陽四縣元初仍爲兗州本朝初因之洪武中升爲兗州府直隸山東布政司領濟寧東平曹沂四州滋陽曲阜寧陽鄒滕泗水嶧金鄉魚臺單城武定陶曹鄆城嘉祥鉅野平陰汶上東阿陽穀壽張郟城費二十三縣

山東東西道宣慰司

元置

益都路 唐青州又升盧龍軍宋改鎮海軍金爲益都路總管府號山東東路又曰京東東路統府二節鎮二縣五十三鎮八十三領益都臨胸穆陵壽光博興臨淄樂安七縣元亦爲益都路領司一縣六

州八州領十五縣本朝改青州府領莒州一益都臨淄博興高苑樂安壽光臨胸安丘諸城蒙陰昌樂沂水日照一十三縣

遼東古青冀二州之域

遼陽等處行中書省爲路七府一屬州十二屬縣十徒存其名而無城邑者不在此數

遼陽路 唐以前爲高句麗及渤海大氏所有遼太祖神冊四年葺遼陽故城以渤海俘戶建東平郡天顯三年遷東丹國民居陞爲南京城云天福十三年改南京爲東京府曰遼陽統遼陽僊鄉鶴野析木柴蒙興遼肅慎歸化九縣割州府軍城八十七金置遼陽府戶四萬六百四領遼陽鶴城宜豐石城四縣天會十年改南京路嘗有東南路都統軍使司治於此以鎮高麗宜豐澄復益潘貴德州廣寧府來遠軍並屬焉元初廢貴德澄復州來遠軍以廣寧府婆娑府懿州

蓋州作四路直隸省。至元六年置東京總管府。降廣寧爲散府隸之。十五年割廣寧立行省。二十五年改東京爲遼陽路。後廢婆婆娑爲巡檢司。壬子年抄籍數領縣一州二。本朝洪武四年置定遼都衛。八年改爲遼東都指揮使司。十年革所屬州縣。置衛。永樂七年復置安樂。自在二州。金領衛二十五州二。

廣寧府路 本漢望平縣地。遼爲顯州。奉先軍。金天輔七年陞爲廣寧府。天會八年改軍名鎮寧軍。天德二年隸咸平。後廢軍隸東京。泰和七年改隸北京。領廣寧望平間陽元封。李魯古反爲廣寧王。舊立廣寧行帥府事。後以地遠遷治臨潢。立總管府。至元六年以戶口單寡降爲東京路總管府。屬郡。十五年復分爲路行總管府事。有醫巫間山爲北鎮。在府城西北一十里。領縣二。本朝廢州縣。改置衛。

肇州曰。按金肇州置防禦使。舊出河店也。天會八年以太祖兵勝

遼肇基王迹於此。遂建爲州。天眷九年十月置防禦使。隸會寧府。海陵時嘗爲濟州。支郡升爲節鎮。軍名興武。五年置漕運司。以提舉兼州事。後廢。貞祐二年復升爲武興軍節鎮。置招討使。以使兼州事。領始興一縣。此肇州又是一處。在鴨子河黑龍江之側。元肇州與名同。故亦附註於此。

山東遼東道肅政廉訪司

元置

大寧路 本奚郡。唐初其地屬榮州。貞觀中奚酋可度內附。乃置饒樂郡。遼太祖建國舉族臣屬。聖宗統和二十二年城之。號曰中京大定府。領恩惠高武安利渝澤北安潭松江十州。創領大定長安富庶勸農文定昇平歸化神水金源十縣。恩州領恩化惠州。領惠和高州。領三韓武安州。領沃野利州。領阜俗渝州。領和衆澤州。領神山灤河。北安州。領利民潭州。領龍山松江州。領松江。計其所領共一十一縣。

金初因之海陵元貞元年更為北京領大定長興富松山神山惠和金源和衆武平靜封三韓十一縣恩化文安二鎮元初為北京路總管府領興中府及義瑞興高錦利惠川建和十州中統三年割興州及松山縣屬上都路至元五年併和州入利州為永和鄉七年興中府降為州仍隸北京改北京為泰寧二十五年改為武平路復大寧路領州九司一縣七

兀良哈 元為大寧路北境本朝洪武二十二年征敗北口來降者衆詔以兀良哈之地置泰寧朵顏福餘三衛以處之為東北外藩命其酋長為指揮使指揮同知各領所部自是每來朝貢

東寧路 本高句麗平壤城亦曰長安城漢滅朝鮮置樂浪玄菟郡此樂浪地也晉義熙後其王高璉始居平壤唐征高麗拔平壤其國東徙在鴨綠水之東南千餘里非平壤之舊至王建以平壤為西京

元至元六年李延齡崔垣玄元烈等以府州縣鎮六十城來屬八年改西京為東寧府十三年升東寧路總管府設錄事司割靜州義州麟州威遠鎮隸婆娑府本路領土山縣中和縣鐵化縣

都護府自唐之季地入高麗置府州縣鎮六十餘城此為都護府雖仍唐舊名而無都護府之實至元六年李延齡等以其地來歸後城治廢毀僅存其名屬東寧路

瀋陽路 本挹婁故地渤海大氏建定理府都督瀋定二州此為瀋州地遼為興遼軍後軍名昭德軍領巖州一州樂郊靈源二縣巖州領白巖縣金復為昭德軍又更顯德軍明昌肆年改為刺史州與通貴德澄三州皆隸東京領樂郊章義遼瀆挹婁雙城五縣後皆燬於兵火元初平遼東高麗國麟州神騎都領洪福源率西京都護龜州四十餘城來降各立鎮守司設官以撫其民後高麗復叛洪福源引

衆來歸授高麗軍民萬戶徙降民散居遼陽潘陽初創城郭置司存
僑治遼陽故城中統二年改爲安撫高麗軍民總管分領二千餘戶
理瀋州元貞二年併西司爲瀋陽等路安撫高麗軍民總管府治遼
陽故城轄總管五千戶本朝洪武二十年改置瀋陽中衛領撫順蒲
河二千戶所

開元路 古肅慎之地隋唐曰黑水靺唐初渠長阿固郎始來朝後
乃臣服以其地爲燕州置水府其後渤海盛靺靺皆役屬之又其後
渤海衰弱爲契丹所攻黑水復擅其地東瀕海南界高麗西北與契
丹接壤卽金鼻祖之部落也初號女真後避遼興宗諱改曰女直太
祖烏古打旣滅遼卽上京設都初會寧州太寧改爲府天眷元年置
上京留守司以留守帶本府尹兼本路兵馬總管後置上京曷懶等
路提刑司領會寧曲江宜春三縣金末其將蒲鮮萬奴據遼東元初

癸巳歲出師伐之生擒萬奴師至開元恤品東土悉平開元之名始
見於此乙未歲立開元南京二萬戶府治黃龍府至元四年更遼東
路總管府二十三年改爲開元路領咸平府後割咸平爲散府俱隸
遼東道宣慰司至順錢糧戶數四千三百六十七本朝洪武二十二
年改置三萬衛

咸平府 古朝鮮地箕子所封漢屬樂浪郡後高麗侵有其地唐滅
高麗置安東都護以統之繼爲渤海大氏所據遼平渤海以其地多
險隘建城以居流民號咸州安東軍領縣曰咸平金升咸平府戶五
萬六千四百四領平郭同山新興慶雲清安榮安歸仁玉山八縣兵
亂皆廢元初因之隸開元路後復割出隸遼東宣慰司

合蘭府水達達等路 土地曠闊人民散居元初設軍民萬戶府五
撫鎮北邊一曰桃温距上都四十里一曰胡里改距上都四千二百

里大都三千八百里有胡里改江并混同江又有合蘭河流入於海
一曰幹朶憐一曰脫幹憐一曰孛古江各有司存分領混同江南北
之地其居民皆水達達女直之人各仍舊俗無市井城郭逐水草爲
居以射獵爲業故設官牧民隨俗而治有合蘭府水達達等路以相
統攝焉有俊禽曰海東青由海外飛來至奴兒干土人羅之以爲土
貢本朝悉境歸附自開原迤北因其部族所居建置都司一衛一百
八十四所二十官其部長爲都督都指揮指揮千百戶鎮撫等職給
與印信牌仍舊各統其屬以時朝貢

山西古冀州之域

元置河東山西道肅政廉訪司

明置山西等處承宣布政使司領太原平陽大同潞安汾五府澤沁遼
三州置山西都指揮司領太原左太原右太原前振武平陽潞州鎮西

七衛保德州寧化沁州汾州四所又置山西行都指揮使司領大同前
大同後大同左大同右天城陽和鎮魯玉林高山雲川朔州威遠安東
中屯十三衛山陰馬邑二所置山西等處提刑按察司分冀寧冀南冀
北河東等四道兼察諸府州衛所三司並治太原而行都司則分治於
大同以控制邊境云

冀寧路 唐爲并州後改太原府宋因之至金析河爲南北路各置
兵馬都總管太原府爲東北路統節鎮三刺郡九縣三十九鎮四十
堡十寨八其太原府戶一十六萬五千八百六十二領陽曲太谷平
晉陽源徐溝榆次祈文水交城孟壽陽十一縣元立太原路總管府
大德九年以地震改冀寧路領司一縣十州十四州領九縣本朝仍
爲太原府領平定忻代崞嵐保德石州六州陽曲太原榆次太谷祁
徐溝清源交城文水壽陽臨縣孟縣靜樂河曲樂平定襄五臺繁峙

崞縣嵐縣與縣榆杜二十二縣

河東山西道宣慰使司元置

大同路 唐為北恒州又為雲州又為雲中郡遼太宗石晉歸地為大同節度重熙十三年升為西京大同府頌弘德二州大同雲中天成長青奉義懷仁懷安七縣弘州領永寧順聖二縣德州領宣德一縣金天德二年置總管府更置留守司及轉運司為西京路統節鎮七刺郡八縣三十九鎮其大同府領大同雲中宣寧懷安天成白登懷仁七縣奉義窘龍安七曠三鎮元初置警巡院至元二十五年改西京為大同路領司一縣五州八州領四縣本朝改為大同府領渾源應州朔蔚四州大同懷仁山陰馬邑靈丘廣靈廣昌七縣
晉寧路 唐晉州金為平陽府河東南路統府 節鎮三防禦一刺郡六縣六十八鎮二十九關六其平陽府天會六年升總管府置轉

運司興定二年以殘破降為散府領臨汾襄陵洪洞趙城霍邑汾西岳陽浮山和川冀氏十縣元初為平陽路大德九年以地震改晉寧路領司一縣六府一州九府領六縣州領四十縣本朝改平陽府領蒲解絳霍隰吉六州臨汾襄陵洪洞浮山趙城太平曲沃翼城蒲縣岳陽汾西臨晉滎河猗氏萬泉河津安邑夏縣聞喜平陸芮城稷山絳縣垣曲靈石鄉寧大寧石樓永和二十九縣
潞州 唐初為潞州後改上黨郡又仍為潞州宋改隆德軍金復為潞州天會六年節度使兼潞南遼沁觀察處置使領上黨壺關屯留長子潞城襄垣黎城涉八縣元初為隆德府行都元帥府事太宗三年復為潞州隸平陽路至元三年以涉縣割入真定以錄事司併入上黨縣領七縣本朝初以上黨縣省入洪武九年直隸山西布政司嘉靖中陞為潞安府領長治長子屯留襄垣潞城壺關黎城平順八

縣

澤州 唐初為澤州後為高平郡又仍為澤州宋屬河東道金隸潞州昭義軍後又改隸孟州元光二年陞為節鎮軍曰忠昌戶五萬九千四百一十六領晉城省端氏入沁水後復置陵州領五縣本朝以晉城縣併入改隸山西布政司領高平陽城沁水陵川四縣

沁州 唐初為沁州又改陽城郡又仍為沁州宋置威勝軍金天會二年仍為沁州元光二年升為節鎮軍曰義勝領銅鋌武鄉沁源綿上四縣元亦為沁州領三縣本朝洪武中以銅鋌縣省入直隸山西布政領沁源武鄉三縣

遼州 唐初置遼州又改箕州又改儀州宋復為遼州為樂平郡刺史金天會六年以與東京遼州同加南字天德三年復去南字領遼山榆社和順儀城四縣元隸晉寧路領三縣本朝以遼山縣併入直

隸山西布政司領榆社和順二縣

嶺北等處行中書省統和寧路總管府

元置

和寧路 始名和林以西有哈刺和林河因以名城太祖十五年定湖北諸郡建都於此初立元昌路後改轉運和林使司

汾州 唐改西河郡為浩州又改汾州又改西河郡又為汾州金天會六年置汾陽軍節度使後又置河東南北路提刑司元初立汾州元帥府領西河孝義介休平遙靈石五縣郭柵洪山二鎮割靈石縣隸平陽路之霍州仍析置小靈石縣後廢府至元二年復行州事省小靈石入介休三年併溫泉入孝義領四縣本朝以西河縣省入改為府隸山西領汾陽孝義平遙介休

河南古豫州之域

元置河南江北等處行中書省為路十二府七州一屬州三十四屬縣

一百八十二又置河南江北道肅政廉訪司

明置河南等處承宣布政使司領開封彰德歸德衛輝懷慶河南南陽汝寧八府及一十二州九十六縣又置河南都指揮使司及河南等處

提刑按察司分河南河北二道兼察諸府州衛所而三司並治於開封

汴梁路唐置汴州總管府石晉為開封府宋為東京建都於此金

改南京路統府三節鎮三防禦八刺郡八縣一百八領開封府祥符

陽武通許太康中牟鄆陵扶溝陳留延津洧川長垣封丘十五縣元

初領歸德府延許裕唐陳毫鄧文潁徐邳嵩宿申鄭鈞睢蔡息盧氏

行襄樊二十一州至元八年命歸德自為一府割毫徐邳宿泗川隸

之升申州為南陽府割裕唐汝鄧嵩盧氏行襄樊隸之九年廢延州

以所領延津陽武二縣屬南京路統蔡息鄭潁許陳睢八州開封

祥符倚郭而屬邑十有五二十五年改南京路為汴梁路二十八年

以瀕河而南大江以北其地衝要又新入版圖置省南京以控治之

三十年升蔡州為汝寧府屬行省割息潁二州以隸焉領司一嘔十

七州五州領縣二十一本朝改為開封府領陳許禹鄭四州祥符陳

留通許太康尉氏洧川鄆陵扶溝中牟陽武原武丘延津陽儀

封商水西華項城沈丘臨潁襄城鄆城長葛新鄭密縣滎陽滎澤河

陰汜水杞縣三十縣

河南路唐初為洛州後改河南府又改東京宋為西京金為中京

金昌府元初為河南府府治即周之王城舊領洛陽宜陽永寧登封

鞏偃師孟津新安渑池九縣後割渑池隸陝州領司一縣八州一州

領縣四本朝改為河南府領陝州一州洛陽偃師鞏縣孟津宜陽登

封永寧新安渑池嵩縣靈寶閿鄉盧氏一十三縣

南陽路唐初為宛州而縣名南陽後州廢以縣屬鄧州歷五代宋

皆為縣。金陞為申州。元至元八年陞為南陽府。以唐鄧裕嵩汝五州隸焉。二十五年改屬汴梁路。後直隸行省。縣二州五州領縣十一。本朝因之。領鄧裕汝三州。南陽鎮平唐縣泌陽桐栢南召內鄉新野浙川舞陽葉縣魯山郟縣寶豐伊陽一十五縣。

汝寧府 唐蔡州。金泰和中陞節度軍曰鎮南。以汝陽上蔡西平確山遂平平輿為屬邑。至元七年省遂平平輿入汝陽。隸汴梁路。三十年河南江北行省平章伯顏言。蔡州去汴梁地遠。凡事稽誤。宜陞散府。遂陞汝寧府。直隸行省。以息潁信陽光四州隸焉。復置遂平縣。領縣五州四州。領縣十。本朝因之。領信陽光二州。汝陽上蔡確山新蔡西平遂平羅山光山固始息縣商城真陽一十二縣。

歸德府 唐為宋州。又為睢陽郡。後唐為歸德軍。宋升南京。金為歸德府。置宣武軍。領睢陽寧陵夏邑虞城穀熟楚丘六縣。金亡宋復取

之。領宋城寧陵夏邑虞城穀熟湯山六縣。元至元二年以虞城碭山

一縣在枯黃河北。割屬濟寧府。又併穀熟入睢陽。鄴縣入永州。降永州為永城縣。與寧陵下邑隸本府。八年以宿亳徐邳並隸焉。壤地平坦。數有河患。府為散郡。領縣四州。四州領縣八。本朝洪武初降為州。屬開封。嘉靖二十四年復為府。而益睢州等縣。并領睢州一州。商丘寧陵鹿邑夏邑永城虞城考城柘城凡八縣。

懷慶路 唐為懷州。宋升為防禦。金改南懷州。又改沁南軍。天德三年去南字。戶八萬六千七百五十六。領河內修武山陽武陟四縣。元初亦為懷州。憲宗七年改懷孟路總管府。至元元年以懷孟路隸彰德。二年復以懷孟路自為一路。延祐六年以仁宗潛邸改懷慶路。領司一縣三州一州。領三縣。本朝改為懷慶府。領河內濟源修武武陟孟縣溫縣。隸河南布政司。

衛輝路 本唐義州。又爲衛州。又爲汲郡。金改河平軍。治汲縣。以滑州爲支郡。大定二十六年。以避河患。徙其城。貞祐三年。徙治於宜村。新城以胙城爲倚郭。領汲新鄉蘇門獲嘉胙城五縣。早生大寧二鎮。元中統元年。升衛輝路總管府。設錄事司。領司一縣四州二本朝改爲衛輝府。領汲縣胙城新鄉獲嘉淇縣輝縣六縣。隸河南布政司。
彰德路 唐相州。又改鄴郡。石晉升彰德軍。金明昌三年。升爲府。領安陽林慮湯陰臨漳輔岩五縣。大禧永和豐樂鶴壁鄴壁五鎮。元太宗四年。立彰德總帥府。領衛輝二州。憲宗二年。割出衛輝。以彰德爲散府。屬真定路。至元二年。復立彰德總管府。領懷孟衛輝四州。及本府安陽臨彰湯陰輔岩林慮五縣。四年。又割出懷孟衛輝。仍立總管。以林慮升爲林州。復立輔岩縣屬之。六年。併輔岩入安陽縣。本朝改彰德府。領磁州一安陽臨漳林縣武安涉縣湯陰六縣。隸河南布政

司

浙江古揚州之域

元置江浙等處行中書省。爲路三十府一州二屬州二十六屬縣一百四十三。又置江南浙西浙東等道肅政廉訪司。

明置浙江等處承宣布政使司。領杭州嘉興湖州嚴州金華衢州處州紹興寧波台州温州十一府。又置浙江都指揮使司。領杭州前杭州右紹興寧波定海台處溫海寧昌國松門臨山金鄉海門盤石觀海十六衛。湖州嚴州金華衢州海寧等所。又置浙江等處提刑按察司。分浙東浙西二道。兼察諸府州衛所。而三司皆治於杭州。其平江無錫常州諸路則改隸直隸。

江南浙西道肅政廉訪司。元置。統後杭州等路。

杭州路 唐初爲杭州。後改餘杭郡。仍爲杭州。五代錢鏐據兩浙號

吳越國宋高宗南渡都為臨安府元改為杭州路總管府二十一年
自揚州遷江淮行省來治于杭改曰江浙行省領縣八州一本朝改
為杭州府領仁和錢塘於潛海寧昌化富陽餘杭臨安新城九縣

湖州路 唐改吳興郡又改湖州宋改安吉州元升湖州路領司一

縣五州一本朝改為湖州府領安吉一州烏程歸安孝豐德清武康長興六縣

嘉興路 唐為嘉興縣石晉為秀州宋為嘉禾郡元置嘉興路本朝

復為嘉興府領嘉興秀水嘉善海鹽平湖桐鄉崇德七縣

浙東道宣慰司都元帥府元治婺州大德六年移治慶元統後慶元等

路

慶元路 唐為鄞州又為明州又為餘姚郡宋陞慶元府元改為慶

元路總管府領司一縣四州二本朝吳元年改明州府洪武十四年

改寧波府領鄞縣慈谿奉化定海象山五縣

衢州路 本太末地唐析婺州之西境置衢州又改信安郡又改為

衢州元至元十三年改衢州路總管府領司一縣五本朝初改龍游

府尋改為衢州府領西安龍游江山常山開化五縣

浙東海右道肅政廉訪司元置

婺州路 唐初為婺州又改東陽郡宋為保寧軍元至元十三年改

婺州路領司一縣六州一本朝改為金華府領金華蘭溪東陽義烏

永康武義浦江江陽溪八縣

紹興路 唐初為越州又改會稽郡又仍為越州宋為紹興府元至

元十三年改紹興路領司一縣六州二本朝復為紹興府領山陰會

稽蕭山諸暨餘姚上虞嶧縣新昌八縣

温州路 唐初為東嘉州又改永嘉郡又為温州宋陞瑞安府元至

元十三年置温州路領司一縣二州三本朝改為温州府領永嘉樂

清平陽瑞安泰順五縣

台州路 唐初為海州復改台州又改臨海郡又為德化軍宋因之
元改台州路總管府領司一縣四州一本朝改為台州府領臨海黃
岩天台仙居寧海太平六縣

建德路 唐睦州又為嚴州又改新定郡宋為建德軍又為遂安軍
後陞建德府元改建德路領縣六本朝初改建安府尋改嚴州府領
建德淳安桐廬遂安壽昌分水六縣

處州路 唐初為括州又改緡雲郡又為處州宋因之元至元十二
年寸處州路總管府領司一縣七本朝改為處州府領麗水青田緡
雲松陽遂昌龍泉慶元雲和宣平景寧十縣

南直隸古揚州之域

元置江南諸道行御史臺統後集慶等路

明太祖高皇帝定鼎於此為京師永樂中於北平肇建北京正統中以
北京為京師遂以此為南京統應天鳳陽廬州淮安揚州蘇州松江常
州鎮江徽州寧國池州太平安慶十四府壽州泗州宿州潁州亳州無
為州六安州海州邳州高郵州泰州通州太倉州廣德州和州滁州徐
州一十七州上元等九十六縣而應天府則為首郡云

集慶路 唐武德初為蔣州又改白下貞觀初更白下曰江寧乾元
初改昇州其後楊氏有其地改為金陵府南唐李氏又改為江寧府
宋復為昇州仁宗以昇王建國升建康軍高宗改建康府元至元十
四年升建康路天曆二年以文宗潛邸改為集慶路領縣三州二本
朝改為應天府領上元江寧句容溧陽溧水高淳江浦六合八縣
太平路 唐置南豫州宋為太平州陞為太平路領司一縣三本朝
改為府直隸京師領當塗蕪湖繁昌三縣

池州路 唐於秋浦縣置池州後廢以縣隸宣州未幾復置宋仍為池州元至元十四年陞為路領縣六本朝改為池州府直隸京師領貴池青陽銅陵石埭建德東流六縣

廣德路 唐初以綏安縣置姚州後廢州改綏安為廣德縣宋為廣德軍元至元十四年陞為路領州一縣二本朝改廣德州直隸京師尋以廣德縣省入領建平一縣

平江路 唐初為蘇州又改吳郡又仍為蘇州宋為平江府元至元十三年陞平江路領縣二州四本朝吳元年改為蘇州府直隸京師領太倉州一吳縣長洲吳江常熟崑山嘉定崇明七縣

常州路 唐初為常州又改晉陵郡又復為常州宋因之元至元十四年陞為路領縣二州二本朝洪武初改為常州府直隸京師領武進無錫江陰宜興靖江五縣

鎮江路 唐潤州又改丹陽郡又為鎮海軍宋為鎮江府元陞為鎮江路領司一縣三本朝初為江淮府後改鎮江府直隸京師領丹徒丹陽金壇三縣

松江府 唐為蘇州屬邑宋為秀州屬邑元至元十四年陞為華亭府十五年改松江府仍置華亭縣以隸之領縣二本朝因之直隸京師領華亭上海青浦三縣

江東建康道肅政廉訪司元置統後寧國等路

寧國路 唐初為宣州又為宣城郡又陞寧國軍宋陞寧國府元陞寧國路總管府戶二十三萬二千五百三十八口一百一十六萬二千六百九十領縣六本朝改為寧國府直隸京師領宣城寧國涇縣太平旌德南陵六縣

徽州路 唐歙州天寶初改新安郡乾元初復為歙州宋改徽州元

陞徽州路總管府領司一縣五州二本朝初改爲興安府後改徽州府直隸京師領歙縣休寧婺源祁門黟縣績溪六縣

淮西江北道肅政廉訪司元置

廬州路 卽漢廬子國唐改廬江郡已仍爲廬州宋爲淮西路元至元中設淮西總管府明年于本路立總管府隸淮西道二十八年以六安軍爲縣來屬後陞六安縣爲州領司一州三州領縣八本朝洪武初改廬州府直隸京師領無爲六安二州合肥舒城廬江巢縣英山霍山六縣

濠州 唐初爲濠州後改鍾離郡又仍爲濠州枕淮帶山與壽陽俱爲淮南之險郡名初從濠後加水爲濠南唐置定遠軍宋爲團練州初隸淮南西路元至元中歸附設濠州安撫司十五年定爲臨濠府二十八年復爲濠州華懷遠爲下縣來屬領三縣本朝爲興王之地

吳元年改臨濠府洪武三年改中立府定爲中都七年改爲鳳陽府自舊城移治中都城直隸京師領壽泗宿穎亳五州臨淮懷遠定遠五河鳳陽虹縣霍丘蒙城盱眙天長靈璧穎上太和十三縣

壽州 唐初爲壽州後改壽春郡宋爲壽春府又以安豐縣爲安豐軍繼遷安豐軍於壽春府金復爲壽州改安豐路本朝改爲壽州蔡徐州 唐初爲徐州又改彭城郡又陞武寧軍宋因之金屬山東西路至元二年例降爲下州舊領彭城蕭永固三縣後永固併入蕭縣彭與錄事司併入州領一縣本朝初隸鳳陽府後直隸京師以豐縣沛縣蕭縣碭山四縣

安慶路 唐初爲東安州又改舒州又改同安郡又復爲舒州宋爲安慶府元至元十三年立安撫司十四年改安慶路總管府屬蘄州宣慰司二十三年罷宣慰司直隸行省領司一縣六本朝初改寧江

府後復為安慶府直隸京師領懷寧桐城潛山太湖宿松望江六縣
淮東道宣慰使司又江北淮東道肅政廉訪司元置

揚州路 唐初改南兗州又改邗州又改廣陵郡又復為揚州宋為

淮東路元至元中建大都督府置江淮等處行中書省十四年罷為

揚州路江淮等處十五年置淮東道宣慰司本路屬焉十九年宣慰

司罷以本路總管府直隸行省二十一年行中書省罷復立淮東道

宣慰使司止統本路并淮安諸郡而本路領高郵府及真滌通泰崇

明五州二十三年行省復建宣慰司遂廢所屬如舊後改立河南江

北等處行中書省移治汴梁路復立淮東道宣慰司割出高郵府為

散府直隸宣慰司領司一縣二州五州領縣九本朝初置淮海府已

改維揚府後復為揚州府直隸京師領高郵通泰三州江都儀真泰

興典化寶應如臯海門七縣

淮安路 居楚州改臨淮郡又仍為楚宋為淮安州元至元十三年

行淮東安撫司十四年改立總管府領山陽鹽城淮安淮陰新城清

河桃園七縣設錄事司二十年陞為淮安府路併淮安新城淮陰三

縣入山陽兼領臨淮府海寧泗安東四郡其盱眙天長臨淮虹五河

贛榆朐山沐陽各歸所隸二十七年革臨淮府以盱眙天長隸泗州

領司一縣四州三州領縣八本朝改為淮安府直隸京師領海邳二

州山陽鹽城清河安東桃源沐陽贛榆宿遷睢寧九縣

福建古揚州之域

元置福建道宣慰使司都元帥府及福建閩海道肅政廉訪司統後福
州等路

明置福建等處承宣布政使司領福州泉州興化建寧延平汀州邵武

漳州八府又置福建都指揮使司領福州左右中福寧鎮東泉州永寧

興化平海漳州鎮海十一衛又置福建行都指揮使司領建寧左右延平汀州邵武五衛及將樂守禦千戶所又置福建等處提刑按察司分福寧建寧二道兼察諸府縣衛所三司並治福州府行都司分治建寧福州路唐為閩州後改福州又為長樂郡又為威武軍宋為福建路元為福州路領司一縣九州二州領縣二本朝洪武元年改為福州府領閩縣侯官懷安古田閩清長樂連江羅源永福福清十縣建寧路唐初為建州又改建安郡宋陞建寧軍元至元二十六年陞為路領司一縣七本朝復為建寧府領建安甌寧建陽崇安浦城政和松溪壽寧八縣

泉州路唐置武榮州又改泉州為閩州而以武榮州為泉州又陞為清源郡宋為平海軍元初陞為泉州路領司一縣七本朝改為泉州府領晉江南安惠安德化安溪同安永春七縣

興化路 宋置太平軍又改興化軍先治興化後遷莆田元至元十四年陞興化路領司一縣三本朝改為興化府領莆田仙遊二縣

邵武路 唐邵武縣屬建州宋置邵武軍元至元十三年改為邵武路領司一縣四本朝洪武初改為邵武府領邵武光澤泰寧建寧四縣

延平路 五代為延平鎮王延政始以鎮為鐔州南唐置劍州宋以利州路亦有劍州乃稱此為南劍州元改延平路領司一縣五本朝改為延平府領南平將樂大田沙縣尤溪順昌永安七縣

汀州路 唐開福撫二州山洞置州治新羅後改臨汀郡又仍為汀州宋隸福建路元至元十五年陞為汀州路領司一縣六本路屯田二百二十五頃本朝改為汀州府領長汀寧化上杭武平清流連城歸化永定八縣

漳州路 唐析閩州西南境置後改漳浦郡又復爲漳州宋因之元至元十六年陞漳州路本朝改爲漳州府領龍溪漳浦龍巖南靖長泰漳平平和詔安海澄寧洋十縣

江西古揚州之域

元置江西等處行中書省爲路一十八州九屬州十二屬縣七十八明置江西等處承宣布政使司領南昌饒州廣信南康九江建昌撫州瑞州袁州吉安臨江贛州南安十三府置江西都指揮使司領南昌前南昌左袁州贛州四衛吉安安福撫州鉛山建昌廣信饒州會昌南安永新信豐十一守禦千戶所置江西等處提刑按察司分南昌湖東西九江嶺北五道兼察諸府衛所三司並治于南昌

江西湖東道肅政廉訪司元置統後龍興等路

龍興路 唐初爲洪州又爲豫章郡又仍爲洪州宋陞隆興府元改

隆興府爲龍興路領司一縣六州二本朝初改洪都府尋復爲南昌府領寧州一州南昌新建進賢豐城奉新武寧靖安七縣

吉安路 唐爲吉州又爲廬陵郡宋陞爲上州元至元十四年陞吉州路總管府置錄事司領一司八縣元貞元年吉水安福太和永新四縣陞州改吉州爲吉安路領司一縣五州四大德三年吉贛立屯田本朝改爲吉安府領廬陵泰和吉水永豐安福龍泉萬安永新永寧九縣

信州路 唐乾元以前爲衢饒撫建四州之地乾元元年始割衢之常山玉山饒之弋陽及撫建二州之地置信州宋因之元至元十四年陞爲路領司一縣五本朝改爲廣信府隸江西布政司領上饒玉山弋陽貴溪鉛山永豐興安七縣

饒州路 唐改鄱陽郡仍改饒州宋因之元陞饒州路總管府領司

一縣三州二。本朝初改鄱陽府。後改饒州府。隸江西布政司。領鄱陽餘干樂平德興浮梁安仁萬年七縣。

瑞州路 唐改建成縣曰高安。卽其地置靖州。又改筠州。宋爲高安郡。又改瑞州。元至元十四年。陞爲瑞州路。領司一縣二州一。本朝改爲瑞州府。領高安新昌上高三縣。

袁州路 唐爲袁州。又爲宜春郡。元隸江西行省。領司一縣三州一。本朝改爲袁州府。領宜春分宜萍鄉萬載四縣。

臨江路 唐有蕭灘鎮。南唐陞爲清江縣。屬筠州。宋卽清江縣置臨江軍。隸江南西道。元隸江西行省。都元帥府。改臨江路總管府。領司一縣一州二。本朝改臨江府。領清江新淦新淦江四縣。

撫州路 唐初爲撫州。又爲臨川郡。又仍爲撫州。元陞撫州路。領司一縣五。本朝改撫州府。領臨川崇仁金谿宜黃東鄉樂安六縣。

九江路 唐初爲江州。又改尋陽郡。又仍爲江州。宋爲定海軍。元陞江州路。領司一縣五。本朝改九江府。領德化德安彭澤瑞昌湖口五縣。

南康路 唐屬江州。宋置南康軍。治星子縣。元至元十四年。陞南康路。領司一縣二州二。本朝爲南康府。領星子都昌建昌安義。

贛州路 唐初爲虔州。又爲南康郡。又仍爲虔州。宋改贛州。元至元十四年。陞贛州路總管府。領司一縣五州二。州領縣三。本朝改爲贛州府。領贛縣雩都信豐興國會昌安遠長寧寧都瑞金龍南石城定南一十二縣。

建昌路 本南城縣。屬撫州。南唐陞建武軍。宋陞建昌軍。元至元十四年。改建昌路總管府。領司一縣三。本朝改建昌府。領南城新城南豐廣昌瀘溪五縣。

新安路 唐陞大庾鎮爲縣屬虔州宋以縣置南安軍元至元十四年改南安路領縣三本朝改爲南安府領南康大庾崇義上猶四縣陝西古雍州之域

元置陝西等處行中書省爲路四府五州二十七屬州十二屬縣八十八轄奉元延安興安諸路

明置陝西等處承宣布政使司領西安鳳翔平涼慶陽延安鞏昌臨洮漢中八府置陝西都指揮使司領西安左西安前西安後固原平涼慶陽延安綏德榆林鞏昌臨洮漢中秦州蘭州洮州岷州河州潼關寧夏寧夏前後寧夏左屯寧夏右屯寧夏中屯寧夏二十五衛鳳翔金州靈州鎮羌四千戶所又置陝西行都指揮使司領甘州左右前後中肅州山丹永昌涼州鎮番莊浪西寧十二衛及鎮口古浪二千戶所置陝西等處按察司分關內二關南隴右西寧河西六道兼察諸府州衛所三司並治西安而行都司則分治甘州以控制邊境云

奉元路 唐初爲雍州後改京兆府又改上都宋分陝西秦鳳熙河涇原環慶鄜延爲六路金併陝西爲京兆慶原熙秦鄜延四路置陝西路統軍司陝西東路轉運司領長安咸寧興平涇陽臨潼藍田雲陽高陵終南櫟陽鄠咸陽十二縣子午鳴犢乾祐孟店毗沙渭城甘河栗邑秦渡十鎮元皇慶元年改爲奉元路領司一縣十一州五州領縣十五本朝洪武初改爲西安府領商同華耀乾邠六州常安咸寧咸陽興平鄠縣藍田臨潼涇陽三原整厓渭南高陵鎮安洛南商南山陽朝邑韓城郃陽澄城華陰蒲城同官富平醴泉武功永壽三水長武淳化白水三十一縣屬關內道

延安路 唐初爲延州又改延安郡又爲延州宋爲延安府金爲鄜延路統節鎮一刺郡四縣十六鎮五城二堡四寨十八關二其延安

府皇統二年置彰武軍總管領膚施延長延州臨真甘泉敷政門山七縣樂盤一鎮元改延安路領縣八州三州領縣八本朝改為延安府領綏德鄜葭三州唐施安塞甘泉安定宜州清澗延長保安延州洛川中部宜君米脂神木府谷吳堡一十六縣屬河西道

興元路唐為梁州又改漢中郡又為興元府宋仍舊元立興元路總管府以鳳金洋三州隸焉宋時領南鄭西縣褒城廉水城固五縣後廢廉水入南鄭元初割出西縣屬沔州以洋州西鄉縣來屬領縣四州二本朝洪武三年改為漢中府領寧羌興安二州南鄭褒城城固西鄉洋縣鳳縣沔縣略陽平利石泉漢陰洵陽白河紫陽二十四縣屬關南道

陝西漢中道肅政廉訪司轄鳳翔鞏昌平涼臨洮慶陽河州等路元鳳翔府唐為扶風郡又為鳳翔府號西京宋為秦鳳路治秦州金

為鳳翔路統府二防禦二刺郡二縣三十三城一堡四寨十四鎮十五其鳳翔軍皇統二年升為府軍名天興大定十七年更軍名亦曰鳳翔大定二十七年升總管府領鳳翔寶雞號郡蓋屋扶風岐山普潤麟遊九縣武城陽平岐陽馬蹟四鎮元初割平涼府秦隴德順西寧鎮寧州隸鞏昌路廢恒州以所領蓋屋縣隸安西府路尋立鳳翔路總管府至元九年更為散府本朝因之領隴州一鳳翔岐山寶雞扶風郿縣麟遊汧陽七縣屬關西道

鞏昌路唐初置渭州後曰隴西郡尋陷入吐蕃宋復得其地置鞏州金為鞏昌府元初改鞏昌路便宜都總帥府統鞏昌平涼臨洮慶陽隆慶五府及秦隴會環金德順徽金洋安西河洮岷利巴沔龍大安襄涇邠寧定西鎮原階成西和蘭二十七州至元三年割安思州屬脫思麻路總管府六年以河州屬吐蕃宣慰司都元帥府七年併



洮州入安思州八年割岷州屬脫思麻路十三年立鞏昌路總管府十四年復行便宜都總帥府事割隆慶府利巴大安褒沔龍等州隸廣元涇邠二州隸陝西漢中道宣慰司而帥府所統者鞏昌平涼臨洮慶陽府凡四秦隴寧定西鎮原階成西和蘭會環金德順徽金洋州凡十有五領司一縣五府四州十五本朝洪武三年改爲鞏昌府屬陝西布政司領徽階秦三州隴西安定通渭會寧寧遠西河漳縣成縣伏羌文縣兩當清水秦安禮縣一十四縣屬隴右道
平涼府 唐爲馬監隸原州宋爲涇原路升平涼軍金立平涼府置陝西西路轉運司陝西東西路提刑司大定二十六年改屬鳳翔路領平涼潘原崇信華亭化平五縣元初併潘原入平涼化平入華亭隸鞏昌帥府領縣三本朝府仍元舊領固原涇靜寧三州平涼崇信鎮原華亭靈臺莊浪隆德七縣屬隴右道

臨洮府 唐臨洮軍宋爲鎮洮軍又爲熙州金爲臨洮府元至元十三年復以涇涇堡升爲縣領縣二本朝因之領蘭河二州狄道渭源金縣三縣屬隴右道

慶陽府 唐慶州宋改慶陽軍又升府金爲慶源路乃陝西西路也統節鎮二刺郡三縣十八鎮二十三城二堡四寨二十二邊將營八其慶陽府置安定軍節度兼總管皇統二年置總管府領安化彭原合水三縣元初改爲慶陽散府併安化彭原入焉領縣一本朝廢仍舊領寧州一州安化合水環縣真寧四縣屬河西道
吐蕃等處宣慰司都元帥府至元九年于吐蕃西界立寧河站本朝洪武八年詔吐蕃各族酋長舉故有官職者至京授職遂置五衛門建官賜印俾因俗爲治今其地爲指揮司宣慰司招討司萬戶府千戶所凡三十有三

河州路 宋初置抱罕縣尋省為寧河寨後復陞為縣屬秦鳳路金

置河州屬熙河路元為河州路屬吐蕃宣慰司都元帥府領定羌

縣河州宋為縣金因之元初仍舊復廢為鎮安鄉宋金俱因唐舊三縣本朝洪武

初置河州衛五年設河州府轄寧河一縣建陝西行都司十年立河

州左右二衛十二年省行都司及河州府縣以左衛調洮州改右衛

為河州衛軍民指揮使司隸陝西都司領千戶所六守禦千戶所

脫思麻路

岷州 宋收復祐州縣置岷州治長道縣之白石鎮改西和州屬利

州路元於祐川縣境復置岷州屬吐蕃等處宣慰都元帥府本朝洪

武十一年置岷州衛軍民指揮使司隸陝西都司領千戶所四軍民

千戶所一

陝西行都指揮使司領衛十二守禦千戶所二

甘肅等處行中書省宋金俱為西夏所據元立甘肅路總管府尋添

立宣慰司後改甘肅等處行中書省領甘州永昌肅州沙州亦集乃

寧夏府兀刺海等七路西涼瓜靈鳴沙應理山丹西寧軍七州本朝

洪武二十四年置甘肅衛

河西隴北道肅政廉訪司

甘州路 宋初為西夏所據改鎮彝郡又改宣德府元改甘肅路尋

改甘州路本朝為甘肅衛尋分置甘州左衛隸陝西都指揮使司

永昌路 唐涼州宋初為西涼府景德中陷入西夏元初仍為西涼

府至元十五年以永昌王宮殿所在立永昌路降西涼府為州隸焉

本朝改置永昌衛隸陝西行都指揮使司

西涼州 宋改西涼府元改西涼州本朝改置涼州衛隸陝西行都

指揮使司

肅州路 唐爲肅州又爲酒泉郡宋爲西夏所據元置肅州路總管府本朝改置肅州衛屬陝西行都指揮使司

沙州路 唐爲沙州又爲燉煌郡宋仍爲沙州景祐初與瓜肅二州俱陷西夏金因之元太祖二十二年分以隸入都大王至元十四年復立州十七年升爲沙州路總管府瓜州隸焉沙州去肅州千五百里內附貧民欲乞糧沙州必須白之肅州然後給與朝廷以其不便故併沙州爲路

瓜州 唐改爲晉昌郡復爲瓜州宋初陷于西夏夏亡州廢元至元十四年復立二十八年徙居民于肅州但名存而已

亦集乃路 在甘州北一千五百里城東北有大澤西北俱接砂磧乃漢之西海郡居延故城夏國嘗立威福軍元太祖二十一年內附至元二十三年立總管府二十三年亦集乃總管府忽都魯言所部

有田可以耕作乞以新軍二百人鑿合卽渠于亦集乃地并以傍近民西僧餘戶助其力從之

寧夏府路 宋時爲西夏地西夏德明嘗城懷遠鎮爲興州以居後陞興慶府又改中興府元置寧夏路隸甘肅行省領靈州鳴沙應理三州本朝初改寧夏府洪武九年府廢改爲寧夏衛隸陝西都司增置寧夏前寧夏後及寧夏左屯寧夏右屯寧夏中屯等衛

四川古荊州之域

元置四川等處行中書省爲路九府三屬府二屬州三十六軍一屬縣八十一蠻裔種落不在其數

明置四川等處承宣布政使司領成都保寧順慶夔州重慶叙州馬湖龍安鎮雄九府潼川嘉定瀘眉雅邛六州東川烏蒙烏撒三軍民府承寧一宣撫司播州宣慰使司黎州思曩日二安撫司平茶長官司置四

川都指揮使司領成都中成都右成都前成都後利州寧川茂州瀘州叙南重慶十衛松潘軍民衛天全六番招討司疊溪保寧雅州青州黔江威州大渡河廣安八所又置四川行都指揮使司領建昌前鹽井會川寧番越雋六衛又置四川等處按察司分川西川東川南川北四道兼察諸府州衛所并宣撫宣慰安撫長官諸司三司並治成都而行都司則分治建昌以控制邊境云

成都路 唐初改蜀郡爲益州又改成都府宋爲益州路又爲成都府路元初立總管府設錄事司領成都嘉定崇慶三府眉邛隆黎雅威茂簡漢彭綿十一州後嘉定自爲一路以眉雅黎邛隸之二十年又割黎雅屬吐蕃招討司降崇慶爲州隆州并八仁壽縣隸本府領司一縣九州七州領縣十一本朝改爲成都府領崇慶漢綿茂威簡六州成都華陽雙流溫江新繁新都金堂仁壽井研郫縣資縣內江

灌縣彭縣崇寧石泉安縣新津什邡綿竹德陽彰明羅江汶川保縣資陽二十五縣

嘉定路 唐初爲嘉州又改犍爲郡又仍爲嘉州宋升嘉定府元立總管府領龍游夾江峨眉犍爲洪雅五縣後併洪雅入夾江領司一縣四州二州領縣三本朝洪武四年改爲府九年改爲州以龍游縣併入直隸四川布政司領峨眉洪雅夾江犍爲榮縣威遠六縣
廣元路 唐初爲利州又改益昌郡又復爲利州宋爲利州路元憲宗三年立利州治設都元帥府至元十四年罷帥府改爲廣元路領縣二府一州四府領縣三州領縣七本朝洪武九年改路爲州以綿谷縣省入後復爲縣屬保寧府

保寧府 唐隆州又改閬州又爲閬中郡後唐爲保寧軍元初立東川路元帥府至元十三年升保寧府二十年罷帥府改保寧路領新

得小寧二州後乃改爲府隸廣元路領三縣本朝因之改隸四川布政司領劍州巴州二州閬中蒼溪南部廣元通江梓潼昭化南江八縣

龍州 唐初爲龍門郡又改龍州又改江油郡又改應靈郡宋改政州繼復舊元爲龍州宣慰司以江油青川二縣省入本朝洪武七年改爲龍州二十三年改龍州軍民千戶所宣德七年改龍州宣撫司隸四川布政司正德中陞爲龍安府領江油石泉平武三縣
順慶路 唐爲南充郡又改兗州宋升順慶府元改東川府後改順慶路設錄事司領司一縣二府一州二府領縣五本朝改順慶府領蓬州廣安二州南充西克營山儀隴渠縣大竹岳池隣水八縣

潼川州 唐梓州又改梓潼郡又爲梓州宋改靜戎軍又改安靜軍又升潼川府元初復立府治至元二十年併涪城及錄事司入郪縣通泉入射洪東關入鹽亭銅山入中江領縣四州二本朝仍爲潼川府洪武九年改爲州併郪縣入焉隸四川布政司領射洪鹽亭中江安岳蓬溪樂至遂寧七縣

永寧宣撫司 唐以彝地置蘭州宋爲瀘州江安合江二縣之境元置永寧路領筠連州及騰川縣後改爲永寧宣撫司領州一本朝洪武初改永寧長官司八年陞宣撫司領長官司一

四川南道宣撫司元置重慶路 唐渝州宋升重慶府元爲重慶路總管府割忠涪二州爲屬郡已又割瀘合來屬省壁山入已縣廢南平軍入南川縣爲屬邑置錄事司領司一縣三州四州領縣十本朝改重慶府領合忠涪三州巴江津長壽大足永川榮昌綦江南川黔江銅梁定遠安居壁山

夔州路 唐初爲信州又爲夔州又爲雲安郡又仍爲夔州宋升爲帥府元立夔州路總管府以施雲安萬大寧四州隸焉二十二年又以開遠梁山三州來屬領司一縣二州七州領縣五本朝洪武四年

改夔州府九年改爲夔州十四年復爲府領達州一州奉節巫山雲陽大寧萬縣開縣新寧東鄉大昌梁山建始太平一十二縣叙南等處蠻彝宣撫司元置

叙州路古夔國唐爲戎州貞觀初徙治夔道在蜀江之西三江口宋易名叙州升爲路隸諸部蠻口宣撫司領縣四州二本朝洪武初改爲叙州府領宜賓慶符富順筠連高縣南溪隆昌長寧珙縣興文十縣

馬湖路古牂牁屬地漢唐以下名馬湖部宋時蠻主屯湖內元立總管府遷于彝部溪口瀕馬湖之南岸創府治其民散居山菁無縣邑鄉鎮領軍一州一本朝洪武四年改爲馬湖府領官司四松潘衛宋前陷于吐蕃元時始內附本朝洪武十一年置松潘衛二十年改松潘等處軍民指揮使司後改松潘衛

疊溪守禦軍民千戶所宋元俱爲羗人所據不置州縣本朝洪武十一年平定西羗以古翼州置疊溪右千戶所隸茂州衛二十五年改今所

上羅計長官司領蠻地羅計羅星乃古夜郎境爲西南種族前代之化外宋設長寧軍十州族姓俱効順各命之官其後分姓他居遂有上下羅計之分亦如唐羈縻之以爲西蜀後戶屏蔽元至元十三年蠻彝部宣撫咎順引本部彝酋得賴阿當歸順十五年授得賴阿當千戶十八年黎州同知李奇以武畧將軍來克羅星長官二十二年彝人叛誘計攝上羅星彝行樞密院討平之其民人散居村箐無縣邑鄉鎮

下羅計長官司領蠻地其境近烏蠻與叙州長寧軍相接均爲西南彝族與上羅計同至元十三年長寧知軍率先內附十五年咎順引

本部彝酋得顏簡詣行樞密院降奏克下羅計蠻彝千戶二十二年
諸蠻皆叛惟本部無異志

四十六團蠻彝千戶所領豕蛾彝地在夔符向南抵定川古夜郎之
屬唐羈縻定州之支江縣也至元十三年牧附于慶符縣僑置千戶
所

鎮雄府 本芒布地古爲屈流大雄甸昔烏蠻之裔宋置西南蕃部
都大巡檢使元置芒布路屬烏撒烏蒙宣慰司本朝改爲芒部府隸
雲南洪武十六年陞爲蒙部軍民府隸四川布政司嘉靖中討平土
酋改爲鎮雄府領歸化懷德威信安請四長官司
羅羅蒙慶等處宣慰司都元帥府元置

建昌路 本古越雋地唐初設中都府治越雋懿宗時蒙詔立城曰
建昌府以烏白二蠻實之析其地置總管府五州二十三建昌其一

路也設羅羅宣慰司以統之本路領縣一州九州領縣一本路立軍
民屯田本朝洪武中罷宣慰司置建昌衛隸四川都司改建昌路爲
府隸四川布政司後廢府改建昌衛爲軍民指揮使司尋置行都司
領建昌衛建昌前衛寧番衛越雋衛鹽井衛會川衛及長官五所入
德昌路軍民府 漢邛都縣地唐沒于南詔路在建昌西南所居蠻
號屈部元至元九年內附十二年立定昌路以本部爲昌州二十三
年罷定昌併入德昌路治本州葛魯城領州四本路立軍民屯田本
朝洪武中改路爲府隸四川布政司後廢置德昌千戶所屬建昌衛
會川路 路在建昌南唐移邛都於此其地當征蠻之要衝諸酋聽
會之所故名天寶末沒于南詔立會川都督府又號清寧郡至段氏
仍爲會川府元至元九年內附十四年立會川路治武安州領州五
本路立軍民屯田本朝洪武中改會川府領武安永昌麻龍等州隸

四川布政司後改置守禦千戶所隸建昌衛已又改會川衛軍民指揮使司

栢興府 昔摩沙彝所居漢爲定笮縣隸越雋郡唐立昆明縣天寶末没于吐蕃後復屬南詔改香城郡元至元十年其鹽井摩沙酋羅羅將樵鹿茹庫內附十四年立鹽井管民千戶十七年改爲閬鹽州以樵鹿部爲普樂州俱隸德平路二十七年併普樂閬鹽縣立栢興府隸羅羅宣慰司領所一

播州宣慰使司 古梁州之境秦夜郎且蘭二縣地漢屬牂牁郡晉隋因之唐分牂牁郡置播州後没於彝宋改置播州安撫司元改爲播州沿邊安撫司本朝洪武初改爲宣慰使司萬曆中播酋楊應龍叛討平之改置郡縣曰平越府領湄潭龍泉餘慶三縣黃平一州州領縣一曰甕安隸貴州布政司曰遵義府領遵義桐梓二縣真安一

州州領縣二曰綏陽仁懷隸四川布政司

餘慶州 本朝洪武十七年改爲長官司屬播州宣慰司萬曆二十八年改爲餘慶縣屬平越州

重安長官司 宋爲黃平府地元因之本朝洪武八年於此置長官司屬播州宣慰司萬曆二十八年改置黃平州屬平越府

播州長官司 元爲播州軍民都鎮撫司本朝洪武九年改爲長官司屬播州宣慰司

王氏曰按播凱之亂其初不過楊輝奪嫡之私耳偶一彝酋上書誣人以逞兵部不覈實而遽許興師非徇情何以有此張瓚欺君曲法造禍百年蔓延邊徼其後展轉調停不過分疆別省耳貸禍首而不究何以服諸彝哉

陸從平云蜀中之有楊酋如黔中之有安酋二酋皆梟獍而安尤

強可以制楊之死命者。惟安楊亦獨忌安無敢逞。乃安能守高皇
帝令通九驛往來滇黔者。悉賴以給。惟是驕伉不習漢法。所部有
犯不卽奉行。然黔軍門而下。微微裁抑之。獨播州惟蜀地而黔軍
門有兼制川東之勅。故亦屬黔。且去蜀遠而去黔近。彼見黔中事
體多裁抑。安氏因專事蜀。且其人黠甚。善交結重慶士大夫。多爲
左右於上官之側者。而蜀之上官亦多受其餽遺。待以優禮。以故
淫凶殘暴。生殺予奪。惟其欲爲無所禁忌。所由來久矣。
王氏曰。按應龍成敗始末。不過內恃海龍岡之險。固外恃水西兵
之救援。其局量不過如此。而當事諸臣始而狎繼而玩。又繼而縱
之。養成滔天之禍。與先朝張璠處楊友楊愛事如出一轍。

湖廣古荊州之域

宋置荆湖南北路京西南路安撫司

元置湖廣等處行中書省。爲路三十州十三府三安撫司十五軍三屬
府三屬州十七屬縣一百五十管番民總管一

明置湖廣等處承宣布政使司。領武昌黃州荊州常德永州寶慶辰州
長沙衡州承天襄陽鄖陽岳州漢陽德安一十五府。郴靖二州。置湖廣
都指揮使司。領武昌。武昌左。靖州。長沙。常德。永州。永定。衡州。岳州。辰州。
平溪。清浪。九溪。鎮遠。偏橋。寧遠。沅州。五開。黃州。蘄州。銅鼓。施州。寶慶。茶
陵。二十四衛。大庸。澧州。寧遠。江華。錦田。枇杷。桃州。天柱。八千戶所。成化
中置行都指揮使司。領鄖陽。襄陽。荊州。荆州。右。瞿塘。五衛。均州。竹山。房
縣。枝江。夷陵。遠安。常寧。忠州。八千戶所。嘉靖初置興都留守。領顯陵。承
天。沔陽。三衛。德安。隨州。二所。又置湖廣等處提刑按察司。分武昌。湖南。
湖北。荆南。四道。監察諸府州衛所三司。並建治於武昌府。而行都司則
分治鄖陽。以控河南。陝西。四川。湖廣。四境之交。

江南湖北道肅政廉訪司統後武昌等路

武昌路 唐初爲鄂州又改寧夏郡又升武昌軍宋爲荆湖北路元後改武昌路領縣七本朝改武昌府領興國州一江夏嘉魚武昌蒲圻咸寧崇陽大冶通山通城九縣

岳州路 唐巴州又改岳州宋爲岳陽軍元立岳州路總管府領縣三州一本朝初爲岳州府尋改岳州後復爲府領澧州一巴陵平江華容石門慈利臨湘安鄉七縣

常德路 唐朗州宋常德府元至元十二年置常德府安撫司十四年改爲總管府領縣一州二州領縣一 本朝復爲常德府領武陵桃源龍陽沅江四縣

澧川 唐初改澧陽郡復改澧州元至元十二年立安撫司十四年改澧州路總管府領縣三州二 本朝初改路爲府洪武中改府爲州隸常德府後改隸岳州府領石門慈利安鄉三縣

辰州路 唐改唐溪郡復改辰州宋因之元改辰州路領縣四本朝改爲辰州府領沅州一沅陵瀘溪溆浦黔陽辰溪麻陽六縣

興國州 本隋永興縣宋置永興軍又改興國軍元至元十四年升興國路總管府領縣三本朝初改爲府洪武九年降爲州以永興縣省入領大冶通山

漢陽府 唐初爲沔州又改沔陽郡宋爲漢陽軍元升漢陽府領縣二本朝因之領縣同

靖州 唐爲溪峒城據彝播叙二州之境宋爲誠州復改靖州元改靖州路總管府領縣三本朝洪武初陞靖州府九年復改爲州以附郭永平縣省入直隸湖廣布政司領會同綏寧通道三縣

襄陽路 唐初爲襄州後改襄陽郡宋爲襄陽府元至元十年爲散

府未幾省十一年改為總管府又立荆湖等路行樞密院十二年立荆湖行中書省後復罷本府領四縣一司十九年割均房二州光化棗陽二縣來屬領司一縣六州二州領縣四本朝復為襄陽府領均州一州襄陽宜城南漳棗陽光化穀城六縣

鄖陽府 唐為鄖鄉縣于此置南豐州尋廢縣屬浙州又改屬均州宋仍舊元改鄖縣本朝初為州屬襄陽府成化中陞為鄖陽府直隸湖廣布政司復置鄖縣為附郭

蘄州 唐初為蘄治後改蘄春郡又仍為蘄州宋為防禦州至元中改總管府領縣五本朝改路為府又改為州屬黃州府領廣濟黃梅二縣

黃州府 唐初為黃州後改永安後復黃州宋為團練軍元至元中立總管府十八年為黃蘄州宣慰司治所後罷宣慰司直隸行省領

司一縣三皇明改黃州府隸湖廣布政司領蘄州一州黃岡麻城蘄水黃陂黃安羅田廣濟黃梅八縣

荆湖北道宣慰司山南江北道肅政廉訪司轄荊州德安安陸等府元置本朝以荊州屬上荆南道承天德安屬荆西道

江陵路 唐荊州復為江陵府宋為荆南府元至元十三年改上路總管府設錄事司天曆二年以文宗潛藩改為中興路領司一縣七本朝改為荊州府領夷陵歸州二州江陵公安石首監利松滋枝江長陽遠安宜都巴東興山十一縣

安陸府 唐為郢州又改富水郡又仍為郢州宋隸京西路元至元十五年升為安陸府領縣二洪武中改為州以附郭長壽縣省入直隸湖廣布政司嘉靖初陞為承天府改沔陽荆門二州縣入焉領沔陽荆門二州鍾祥京山潛江景陵當陽五縣

德安府 唐安州又改安陸郡又仍為安州宋為德安府元隸湖北道宣慰司十八年罷宣慰司直隸鄂州行省為散府後改以來屬領州一縣六本朝洪武初改德安州隸黃州府十三年復為德安府領隨州一州安陸孝感應城雲夢應山五縣

湖南道宣慰司嶺北湖南道肅政廉訪司元置統後天臨等路

天臨路 唐為潭州長沙郡宋為湖南安撫司元初改潭州路後以文宗潛邸所幸改天臨路領縣五州七本朝初改為潭州府洪武五年復為長沙府領茶陵州一長沙善化湘潭湘陰寧鄉瀏陽安化醴陵益陽湘鄉攸縣十一縣

衡州路 唐初為衡州又改衡陽郡又仍為衡州宋因之元改衡州路領縣三本朝改為衡州府領桂陽州一衡陽衡山耒陽常寧郵縣臨武藍山安仁八縣

永州路 唐改零陵郡為永州宋因之元改永州路領縣三本朝改為永州府領道州一零陵祁陽寧遠江華東安永明六縣

郴州 唐改桂陽郡為郴州宋因之元改郴州路領縣六本朝改為郴州以附郭陽縣省入直隸湖廣布政司領縣永興桂陽桂東宜章興寧五縣

寶慶路 唐邵州又為邵陽郡宋升寶慶府元改寶慶路領司一縣二本朝改為府領武岡州一新化邵陽新寧城步四縣

施州衛 唐改清江郡又改清化郡又復為施州宋因之舊領清江建始二縣元併清江入州領建始一縣本朝洪武初仍置施州屬夔州府及置施州衛二十三年省州入衛改置施州衛軍民指揮使司屬湖廣都司編戶三里領軍民千戶所一宣撫司三安撫司八長官
八蠻夷長官司五而容美宣撫司亦在境內



廣東古揚州古南境

宋置廣南東路經畧安撫司治韶州

元置廣東道宣慰使司都元帥府海北廣東道肅政廉訪司統廣州等路

明置廣東等處承宣布政使司領廣州韶州南雄惠州潮州肇慶高州廉州雷州瓊州十府又置廣東都指揮使司領廣州左右廣州前後南海廣海清遠惠州碣石肇慶雷州海南神電潮州廉州十五衛增城新會新興陽江德慶韶州南雄七守禦千戶所又置廣東等處提刑按察司分嶺南嶺東嶺西海南海北五道兼察諸府州衛所而三司並治廣州

廣州路 唐改南海郡又仍爲廣州宋升爲元帥府元爲廣州路立廣東道宣慰司領司一縣七本朝改廣州府領連州及南海番禺順

德東莞從化龍門新寧增城香山新會清遠三水新安陽山連山一十五縣

韶州路 唐初爲番州又更名東衡州又爲始興郡又仍爲韶州元因之領司一縣四本朝洪武初改爲韶州府領曲江樂昌仁化乳源翁源英德六縣

惠州路 唐爲循州宋改惠州又改博羅郡又復爲惠州元至元十六年改惠州路總管府領縣四本朝洪武初廢循州改置惠州府領歸善博羅長寧永安海豐河源龍州長樂興寧和平十縣

南雄路 本始興縣五代劉氏割韶之保昌始興二縣置雄州宋以河北有雄州改爲南雄州元至元十五年改南雄路總管府領縣二本朝洪武初改路爲府領縣同

潮州路 唐初爲潮州又改潮陽郡又復爲潮州元升爲潮州路領

司一縣三。本朝洪武二年改路爲府，領海陽潮陽揭陽程鄉饒平惠來大埔澄海普寧平遠十一縣。

德慶州 唐初爲南康州，又名康州，又改晉康郡。宋升德慶府，元改德慶路，領縣一。本朝洪武初改爲府，尋改爲州，以端溪縣省入屬肇慶府，領封川開建二縣。

肇慶路 唐初爲端州，又改高要郡，又仍爲端州。宋升肇慶府，元改爲路，初隸廣西，復隸廣東。本朝洪武元年改路爲府，領德慶一州高要四會新興陽春陽江高明恩平廣寧封川開建八縣。

海北海南道宣慰司，又置海北海南道肅政廉訪司，統雷州等路。元置本朝仍置海北海南二道。

雷州路 唐初爲合州，又更名東合州，又爲海康郡，又改雷州。元升爲雷州路，領縣三。本朝改爲雷州府，領海康遂溪徐聞三縣。

高州路 唐爲高涼郡，又爲高州。宋廢高州入賓州，後復置。元升爲路，戶一萬四千六百七十五口，四萬三千四百九十三。領縣三。本朝洪武初改高州府，徙治茂名，領化州一。茂名電白信宜吳川石城五縣。

廉州路 唐爲合浦郡，又改廉州。元升爲廉州路，領縣二。本朝洪武初改爲廉州府，又改爲廉州，屬雷州府。十四年復爲府，領欽州一。合浦靈山二縣。

乾寧軍民安撫司 唐以崖州之瓊山置瓊州，又爲瓊山郡。宋爲瓊州安撫郡監。元改乾寧軍民安撫司。本朝洪武初改爲瓊州，尋升爲府，領儋萬崖三州。瓊山臨高澄邁文昌定安會同樂會昌化陵水感十縣。

廣西古荊州之域

宋屬廣南西路置經畧安撫司

元置兩江道宣慰使司都元帥府嶺南廣西道肅政廉訪司至正未始於靜江置廣西等處行中書省

明改置廣西等處承宣布政使司領桂林柳州慶遠平樂梧州潯州南寧太平思恩田州思明鎮安十二府江州泗城奉議思陵利州龍州向武都康八州又置廣西都指揮使司領桂林右桂林中南寧柳州慶遠潯州馴象南丹奉議九衛及全州灌陽平樂遷江富川梧州容縣懷集賀縣鬱林十守禦千戶所又置廣西等處提刑按察司分桂林蒼梧左江右江四道兼察諸府州衛所而三司並治於桂林

靜江路 唐初爲桂州又改始安郡又改建陵郡又升靜江軍宋因之元改靜江路領縣十本朝改桂林府領永寧全州二州臨桂興安靈川陽朔永福義寧灌陽七縣

南寧路 唐初爲唐晋州又改邕州又爲永寧郡元至元十六年改爲邕州路泰定元年改爲南寧路領縣二本朝洪武初改路爲府領新寧州橫州上思州三宣化武緣永淳隆安四縣

潯州路 唐改潯江郡又仍爲潯州元升爲潯州路領縣二本朝洪武元年以貴橫二州及永淳縣來屬三年改路爲府改貴州爲貴縣九年以橫州永淳屬南寧止領武靖州一貴縣桂平平南三縣

柳城路 唐改龍城郡又改柳州元改柳城路領縣三本朝改爲柳州府徙治馬平領象賓二州馬平羅城洛容柳城懷遠融縣來賓武宣遷江上林十縣

慶遠南丹溪洞等處軍民安撫司 初爲宜州後改龍水郡宋爲慶遠府元改慶遠路總管府大德元年以中書省臣言改慶遠南丹溪洞等處軍民安撫司領縣五本朝洪武初復爲慶遠府領河池南丹

東蘭那地四州宜山天河思恩忻城荔波五縣

平樂府 唐以平樂縣置樂州復改昭州又改平樂郡又仍為昭州

宋因之元改為平樂府戶七千六十七口三萬三千八百二十領縣

四本朝因之領永安一州平樂富川賀縣恭城昭平荔浦修仁七縣

果化州 宋置屬橫山寨元屬田州路本朝初因之後改屬廣西布

政司

向武州 宋置屬橫山寨元屬田州路本朝洪武間改置向武軍千

戶所三十三年罷所復置州直隸廣西布政司領縣一富勞沿革未

詳

奉議州 宋置屬廣西經畧安撫司元屬田州路本朝洪武五年省

入來安府七年復置二十八年改置奉議衛尋罷衛復置州直隸廣

西布政司

上隆州 宋屬橫山寨元屬田州路本朝初因之後改隸廣西布政

司

思恩府 唐置隸邕州都督府宋隸邕州遷隆鎮元屬田州路本朝

洪武初因之永樂三年改隸廣西布政司正統五年改為思恩府尋

改思恩軍民府

歸德州 宋屬橫山寨元屬田州路本朝初因之後改隸廣西布政

司

都康州 宋置屬橫山寨元屬田州路本朝初因之洪武間為夷獠

所據三十二年復置直隸廣西布政司

利州 宋建屬邕州橫山寨元屬來安路本朝洪武初改屬廣西布

政司

泗城州 宋建屬邕州橫山寨元屬來安路本朝移治古礮洞隸廣

西布政司

歸順州 本朝弘治九年添置

以上俱屬右江

思明路軍民總管府 宋隸邕州永平寨元置思明路本朝洪武元年改爲思明府領忠州思明上石西下石西憑祥五州

太平路軍民總管府 本朝洪武二年改爲太平府初治馱盧未幾

復還麗江領太平思城安平養利萬承左州全茗鎮遠思同茗盈龍

英結安結倫都結上下凍十五州崇善陀陵永康羅陽四縣

以上俱屬左江

鎮安路 宋於鎮安洞建右江鎮安軍民宣撫司元改鎮安路本朝

洪武二年以舊治僻遠移建廢凍州改鎮安府屬縣上林

王氏曰按大藤峽賊即兩廣蠻寇也峽水發源於柳州慶遠又東

流至於潯州是爲潯江帶象州永安修仁荔浦平樂諸縣其水皆

夾山礮而下矜研截業稱最陰惡惟大藤峽截潯水而南爲府江

府江大藤相去約三百餘里諸蠻恃藤峽爲隩區以桂平大宣鄉

崇姜里爲前庭象州東鄉武宣北鄉爲後戶藤縣五屯障其左貴

縣龍山據其右若兩臂然峽以北岩洞以百計如仙女關九層岩

極險絕者亦十數處迤南又有牛腸大帖諸村賊皆緣山立寨又

藤峽府江之間有力山險於藤峽數倍地域益六百里云中產徭

人然藍胡侯盤四姓爲渠魁如力山等虜又有獯人善傳毒弩矢

矢中人無不立斃雖四姓諸徭亦憚之

按隆慶六年五月復廣西田州灌陽縣國初灌陽縣編戶十四里

以徭寇殘破居民流徙田多荒蕪僅存八里又調他軍衛屯守許

自占田懇種田租歸軍衛者十六七民籍耗減存者僅六里至是

撫臣郭應聘以古田既平清丈田畝請以軍餘承種民田者皆入
有司以復十四里之額從之

貴州古荆梁二州南境

元置八番順元等處軍民宣慰使司都元帥府本西南口羅施鬼國地
明洪武初以其地分隸湖廣四川雲南三布政司永樂十一年始置貴
州等處承宣布政使司領府八州六縣六宣慰司一安撫司二長官司
七十五又置貴州都指揮使司領貴州等十衛又置貴州等處提刑按
察司分安平思石貴寧新鎮四道兼察諸司府州衛所而三司並治於
貴州宣慰司

貴陽府 元置順元等路軍民安撫司屬八番順元等處軍民宣慰
司本朝洪武初以其地隸四川布政司永樂十一年改隸貴州布政
司隆慶三年析置貴陽府領長官司一十五

貴州宣慰使司同貴陽府地元置八番順元等處軍民宣慰司本朝洪
武初改置貴州宣慰使司隸四川布政司永樂十一年改隸貴州舊領
長官司二十三隆慶初析十六長官司屬貴陽府乃以金筑安撫司并
所屬隸宣慰司今領安撫司一長官司十一

思南府 宋置思州元改置思州軍民安撫司至元間改宣撫司本
朝洪武初改思南宣慰使司隸湖廣布政司永樂十一年改爲府隸
貴州布政司領水德蠻夷祐溪朗溪長官司四婺川印江縣二

鎮遠府 舊爲豎眼大田谿洞元初置鎮遠沿邊谿洞招討使後改
爲鎮遠府屬思州軍民宣撫司本朝洪武五年改爲鎮遠州隸湖廣
布政司永樂十一年仍於州置鎮遠府隸貴州布政司正統中省鎮
遠州領印水偏橋長官司二鎮遠施秉縣二

石阡府 元置石阡等處長官司隸思州軍民宣撫司本朝永樂十

一年改石阡府隸貴州布政使司領石阡苗民葛彰商龍泉坪長官司四

銅仁府 古爲溪蠻地元置銅人大小江等處軍民長官司隸都雲定雲等處安撫司後改隸思州軍民宣撫司本朝洪武初改銅仁長官司永樂十一年增置銅仁府隸貴州布政司領銅仁省溪隄溪大萬山烏羅平頭者可長官司六

思州府 元爲思州軍民宣撫司地本朝洪武初分置思州宣慰司永樂中改爲思州府領都坪都素施溪黃道溪長官司四

黎平府 宋屬湖北路谿洞各授土人爲蠻彝官掌之元置潭谿等處軍民長官司隸思州宣撫司本朝洪武初仍置蠻彝長官司又增立五開衛以鎮之屬思州宣慰司永樂十一年改置黎平宣化二府屬貴州布政司宣德十年以宣化府省入黎平領潭溪八舟洪州泊

里曹滴洞古州西山陽洞湖耳亮寨歐陽新化中林驗洞赤溪南洞龍里長官司十五永從縣一

都勻府 古西南口元置都雲等處安撫司屬雲南行省本朝洪武十六年仍元舊二十三年改都勻衛軍民指揮使司領都勻等七長官司屬四川布政司永樂十七年始以七長官司屬貴州布政司而本衛屬貴州都司成化十年陞都勻府又以獨山麻哈三長官司爲州清平衛爲縣及樂平平定二長官司皆隸焉今領獨山麻哈二州清平一縣都勻邦水平浪平州麻哈樂平平定合江州陳蒙爛土豐寧八長官司

新添衛軍民指揮使司 古荒服地宋嘉泰初土官宋永高覓服麥新等處乃改麥新爲新添元置新添葛蠻安撫司屬湖廣行省後改屬雲南行省元末廢本朝洪武四年置新添長官司二十二年增置

新添千戶所屬四川貴州衛二十九年改爲新添衛軍民指揮使司屬貴州都司領新添小平伐把平寨丹平丹行長官司五龍里衛軍民指揮使司古西南邊徼歷代以來蠻酋各據其地元始置平伐等處長官司屬新添葛蠻安撫司本朝洪武初於此置龍里衛軍民指揮使司屬貴州都司領平伐太平伐二長官司後以平伐長官司改屬貴陽府止願太平伐一長官司

王氏曰田琛者故思州宣慰使也自宋元來世有思州宗族蕃衍自叙出自關中蓋漢高帝徙齊諸田關中而巴蜀關中近地遂蔓延於此今婺川縣有齊地圖猶稱齊田云諺曰恩播田楊兩廣岑黃言大姓也本朝吳元年田仁智納土歸附詔立思州宣慰可以仁智爲宣慰使其族人田茂安者據沿河婺州以獻僞夏明玉珍洪武五年明玉珍敗茂安乃降立爲思南宣慰使永樂十一年遂

建布政司貴州

按二宣慰之就擒也神謀睿策亦已周矣發單軺持尺札入彝落桑蔭未徙而縛其兩雄市不易肆何其善哉迺今剪滅草竊直眇小耳符檄紛紜張皇漏洩蓋承平狃縱賞罰不定上不圖危而下不習武也

王氏曰阿向者都勻府部苗也本朝嘉靖十六年據凱口圍爲亂圍圍十餘里高四十丈四壁斗絕獨一徑尺許曲折而登上有天池雖旱不竭積糧可支五年

按萬曆中貴州巡按宋典祖奏貴州古夜郎鬼方地設在衆土司之中三苗諸口環列于外其間僅通羊腸一路實楚蜀滇咽喉要區祖宗開疆建衛所二十衆置武職多列軍伍豈無意哉衛千戶所伍額軍五千合之可得十萬人彝苗生心卽驅以掃除無難蓋

屹然雄鎮也

雲南古梁州之域

元置雲南諸路行中書省爲路三十七府二屬府三屬州五十四屬縣四十七其餘甸寨軍民等府不在此數雲南本古梁州之南境爲徼外□地漢領以益州部刺史自唐至宋爲蒙氏段氏所據天祚二年歲在壬子元世祖以親王授鉞專征秋九月出師冬十二月濟河春歷鹽夏夏四月出蕭關駐六盤八月絕洮渝吐蕃分軍爲三道遣使大理招之道阻而還十月過大渡河世祖率騎繇中道先進十一月渡瀘所在望風款附再招之至其國遇害十二月薄其都城城倚黠蒼山西洱河爲固國主段興智及其臣高泰祥背城出戰大敗之又使招之三返勿聽下令攻之東西道兵亦至及登黠蒼臨視城中宵潰興智奔善闡追及泰祥於姚州俘斬以殉分兵畧地所向皆下惟善闡未附明年春留大

將兀良哈解經畧之未幾叛善闡得興智以獻釋不殺進軍平烏蠻部落三十七攻交趾破其都收復磨溪洞三十六金齒白衣羅鬼緬中諸蠻相繼歸附雲南平列爲郡縣凡總府三十七散府八州六十縣五十甸部寨六十一分隸諸道立行中書省於中慶以統之

明改置雲南等處承宣布政使司領雲南大理臨安楚雄澂江廣西廣南鎮沅蒙化景東永寧順寧孟定孟艮一十四府曲靖姚安鶴慶武定尋甸麗江元江永昌八軍民府嵩明等四十一州車里軍民等七宣慰司南甸千崖隴川三宣撫司十二關等二十一長官司又置雲南都指揮使司領雲南左右中前後廣南大理臨安曲靖景東楚雄洱海平夷越州蒙化陸涼永昌大羅一十八衛瀾滄騰衝二軍民指揮使司宜良易門安寧馬隆楊林堡十八寨木密關七守禦千戶所又置雲南等處提刑按察司分普安臨元金滄洱海四道兼察諸府州衛所三司則並

治於雲南府

雲南府 蜀漢初置雲南郡晉因之兼置寧州宋齊並為建寧郡隋置昆州後廢唐初復置南詔蒙氏改為善闡府元初置善闡萬戶府至元中改置中慶路領縣三州四州領縣八本朝洪武中改雲南府領嵩盟晉寧安寧昆陽四州昆明富民宜良易門歸化呈貢羅次祿豐三泖九縣

楚雄府 宋時大理段氏改白鹿部後改威楚郡元置威楚萬戶府至元中改為威楚路後置威楚開南等路宣撫司於此領四州三縣本朝洪武十五年改置楚雄府領南安鎮南二州楚雄廣通定遠定邊碶嘉五縣

景東府 南詔蒙氏為銀生府之地後為金齒白蠻侵奪其地宋時大理段氏莫能治元初討平之以其所部隸威楚萬戶至元中改置開南州隸威楚路本朝洪武中改為景東府

武定軍民府 本烏蠻名羅婺部元初內附置羅婺萬戶府至元中併仁德于矢二部入羅婺更置北路總管府尋改武定路治南甸縣領二州四縣本朝改為武定軍民府領和曲祿勸二州元謀一縣鶴慶軍民府 唐時為越析詔之地名鶴川及隸共川南詔於樣共置謀統郡元初內附置鶴川尋置二千戶仍稱謀統屬大理上萬戶至元末陞鶴慶府尋改鶴慶路領劍川一縣本朝洪武中改為府後改鶴慶軍民府領劍川順州二州

廣南府 宋時名特磨道儂智高之裔居之元至元立廣南西道宣撫司領路城等五州後來安路奪其路城上林羅佐三州惟領安寧富州二州本朝洪武中置廣南府領富州一州

麗江軍民府 南詔於此置麗水節度宋時為麼些蠻酋蒙醋醋所

續文獻通考卷之二十一
據元初討平之置茶罕章宣慰司至元中改置麗江路軍民總管府
後罷府置宣撫司領一府七州一縣本朝洪武十年改爲麗江府後
改軍民府舊領臨西縣後革領通安巨津寶山蘭州四州見永寧下
永寧府 宋時屬大理段氏元時內附置答藍管民官尋改置永寧
州屬北勝府本朝洪武中屬鶴慶府二十九年改屬瀾滄衛永樂四
年陞爲府領刺次和革甸瓦魯之香羅四長官司
曲靖軍民府 南詔蒙氏置石城郡宋時大理段氏因之後爲磨彌
部所據元初置磨彌部萬戶至元間改中路後改爲曲靖路陞宣慰
使領五州七縣本朝洪武中改爲曲靖軍民府領南寧亦佐二縣霑
益陸涼馬龍羅雄四州
澂江府 治在滇地東南唐屬牂州隸黔州都督府開元中降爲羈
縻州今口中名其地曰羅伽甸初麼些蠻居之後爲爨蠻所奪南詔

蒙氏爲河陽郡至段氏麼些蠻之裔復居此甸號羅伽部元憲宗四
年內附六年以羅伽部爲萬戶至元三年改萬戶爲中路十六年升
爲澂江路領縣三州二州領縣三本朝洪武十七年改爲澂江府領
新興路南二州江川河陽陽宗三縣

尋甸軍民府 古滇國地在蒙氏爲尋甸段氏改仁德部元至元初
置仁地萬戶府後改仁德府領爲美歸厚二縣本朝洪武中改尋甸
軍民府以二縣省入

臨安府 宋時大理段氏改爲通海節度又改秀山郡尋復爲通海
郡其後蠻酋互相侵奪或屬善闡或屬阿爨元初置阿爨部萬戶至
元初改置南路尋改臨安路領三州一千戶四縣郭本朝洪武中改
爲臨安府領建水石屏阿迷寧州四州通海河西嶧峨蒙自四縣納
樓教化玉弄虧容溪處思陀左能落恐安南九長官司

廣西府 東爨烏蠻彌鹿等部所居唐爲羈縻州隸黔州都督府時有師宗彌勒二部內附因籍爲軍立廣西路十八年復爲民領州三本朝改爲廣西府領師宗彌勒維摩三州

元江軍民府 南詔蒙氏以屬銀生節度又開威遠等處置威遠賧宋時爲些麼徒蠻所有元時內附置元江萬戶府後於威遠更置元江路領馬籠步日等部屬臨安廣西元江等處宣慰司本朝洪武中改元江府永樂初改元江軍民府領長官司一

新化州 本馬龍他郎二甸阿契諸部蠻自昔據之元初內附立爲二千戶所屬寧州萬戶府至元間以馬龍等甸營民官併於他郎甸置司屬元江路本朝初改名馬龍他郎甸長官司後陞爲新化州隸雲南布政司

鎮沅府 南詔蒙氏爲銀生府之地元初內附屬威遠州後置案板

寨屬元江路本朝洪武末改置鎮沅州永樂初陞爲府領祿谷長官司一

大理金齒等處宣慰司都元帥府 元置

大理府 段氏號大理國元初立上下二萬戶府至元間改置大理路領二府五州四縣本朝洪武十五年改路爲府領趙鄧川賓川三州雲南浪窮新平三縣

永昌軍民府 南詔蒙氏段氏高氏俱爲永昌府元初於永昌立三千戶所隸大理萬戶府至元間置永昌州尋陞爲府隸大理路及置金齒等處宣撫司治此領永平一縣本朝洪武十五年仍置府又立金齒衛至二十三年省府以金齒衛爲軍民指揮使司嘉靖中改爲永昌軍民府領騰越新化二州保山永平二縣長官司二

蒙化府 蒙氏初號蒙舍城後改蒙舍城爲陽瓜州段氏改開南縣

元初置蒙舍千戶至元間改蒙化府尋陞爲路後復降爲州屬大理路本朝仍爲州屬大理府正統間復陞爲府領雲龍一州雲龍州卽雲龍甸

姚安軍民府 宋時段氏改栢棟府曰姚州唐以其民多姓姚故名元初立統矢千戶至至元間改置姚州屬大理路天曆間陞姚州路領大姚一縣本朝改路爲府後改爲姚安軍民府領州一縣一

孟定府 舊名景麻至元二十六年改孟定路軍民總管府領二甸隸大理金齒等處宣慰使司本朝洪武十五年改置孟定府

孟艮府 蠻名孟措本朝永樂四年來歸附始置府

順寧府 本蒲蠻之地名慶甸宋以前不通中國雖蒙氏段氏亦不能制元泰定間始附而天曆初置順寧府并置慶甸縣本朝洪武十五年仍置府以慶甸省入

猛密孟養長官司

猛密者木邦宣慰司部落也木邦自國初納款授官與八百緬甸車里孟養諸酋競強鼎立而猛密有寶井爲木邦利府陶猛司歪領之宣慰使罕牒以其女曩罕弄妻司歪罕牒死孫罕空立嗜酒好殺曩罕弄遂以猛密叛成化初南寧伯毛勝守雲南墨猛密寶石許得自貢不關木邦太監錢能尤婪索無厭曩罕遂怙勢縱橫畧地自廣太監王舉索寶石猛密曩罕弄罵不與遂疏猛密叛木邦罪請征之時大學士萬安納曩罕弄賄遂以所畧木邦地界之爲設安撫司以司歪子孫世襲其職陶猛倫索提兵衛罕空聲言必滅猛密會敬皇帝立副使林後稍稍割猛密地還木邦曩罕弄不敢逆命遂與木邦並立世讐殺矣孟養故宣慰使司也正統初宣慰使刁賓玉昏懦部下酋思仁遂擁衆麓川叛孟

養畧取其地刁賓玉奔永昌思仁遂屠騰衝據潞江事聞睿皇帝命黔國公沐晟都督方政沐昂往征之師敗績方政死之上乃遣兵部尚書王驥定西伯蔣貴率卒一十二萬往擊思仁思仁敗走緬甸驥遂割思仁所畧孟養地畀緬甸購思仁斬之緬甸以其子銀起葬居守孟養頂之麓川口復擁思仁少子思祿攻銀起葬敗之復有孟養之地驥等慮師老無功遂約思祿許得部勒諸口居孟養如故復與立石畫金沙江爲界乃班師弘治初孟養宣慰司廢除已久兵部誤以金牌信符頒給思祿遂以牌符號召諸口畧取旁邑自廣會猛密叛木邦事久不平叅政毛科者以平猛密自任遂檄兵思祿思祿以羸兵數千應猛密設伏殲之科僅以身免思祿遂渡金沙江攻猛密取蠻莫等十七寨遂不可制思祿遣人奏願入蠻莫十寨贖罪得比米魯乞以一子爲土官復宣慰如故朝議弗許思祿遂據孟養而自立

王氏曰按猛密孟養之亂譬諸蔓草樹以中官而灌以閣輔日益滋長雖欲芟刈不可得矣麓川之役舉朝皆以爲非謂王振專權逞忿而李文達公亦言麓川初叛不委晟而遣別將遂至喪師此皆失實潞江致敗晟實罪魁第朝議以晟元勲之裔關土安南有功復畏法引慝自殞得蒙贈謚亦已幸矣思仁抗王師殲大將釋而不誅辱國益甚振之罪惡通天若主征麓川義正言順不可非也三原王公撰忠敬王廟碑其言亦與文達畧同溢美文過爲家狀所蒙第未知國史所傳竟何稽也

滇南始末

滇域未通中國之先有低牟苴者居永昌哀牢之山麓今金齒地有婦曰沙壹浣絮水中觸沈木若有感是生九男曰九隆族種類滋長支裔蔓衍竊據土地散居谿谷分爲九十九部其渠酋有六各號爲詔夷語謂詔

為王其一曰蒙舍詔今蒙化府其二曰浪施詔今浪寧縣其三曰鄧賧詔今鄧州其

四曰施浪詔今浪寧縣其五日摩娑詔今麗江府其六曰蒙雋詔今建昌兵

埒不能相君長至漢有仁果時九隆八族之四世孫也強大居昆彌川

今白崖傳十七世至龍祐那當蜀漢建興三年諸葛武侯南征雍闓師

次白崖川獲闓斬之封龍祐那為酋長賜姓張氏割永昌益州地置雲

南郡於白崖諸夷慕武侯之德漸去山林徙居平地建城邑務農桑諸

部於是始有姓氏龍祐那之十六世孫曰張樂進求遜位于蒙氏考其

時蓋唐世也張氏或稱昆彌國或稱白國或稱建寧國其年系莫可推

詳

終

真番之境實為神京左臂自大寧失險寧前高平諸處一綫之塗聲援
易阻識者有隱憂焉南通滇渤倭警雖稀而金復蓋三衛僻在海墻號
稱沃壤

薊鎮 按薊鎮自山海抵居庸延袤遼闊國初號稱腹裏頃緣大寧內
徙宜遼隔絕

宣府鎮 按宣府自東徂西邊長一千餘里雄據上谷藩屏陵京譬則
身之肩背室之門戶也肩背實則腹心安門戶嚴則堂奧固其關涉豈
細細哉

大同鎮 按大同古雲中地也西起了角東止陽和邊長六百四十餘
里東北與諸和連袂西接套人在九邊中稱絕塞焉大邊之外即為豐
州地多饒沃先年北雖駐牧每遇草盡則營帳遠移乃今築城架屋東
西相望咸稱板升其所羣聚者無非驅掠之民與夫亡命之輩也

山西鎮 按山西自丫角墩起至老牛灣止邊長一百餘里外藉大同以爲藩籬內持三關以爲捍蔽該鎮邊患似非所憂也雖有大同爲之藩屏北自威遠平魯而下卽抵莜麥川奔利民堡或由平刑窺鴈門一入內地勢若河決于此而欲角戰以求勝顧不難哉

延綏鎮 按延綏東起黃浦川西止定邊營邊長地遠爲套人克斤之地然自神木迤東逼近黃河難通大舉神木迤西直至石澇乾溝等處環遠千五百里雖有二邊傾圮已甚不足爲據而又以地多沙漠種植爲難芻糧不克曾不宿飽議者欲于府谷至葭州由黃河而上造舟轉運以濟清水木瓜孤山等處亦爲甚便

寧夏鎮 按寧夏古朔方河西地也東起鹽場西盡中衛東南距河爲險北倚賀蘭爲固在昔稱四塞焉

固原鎮 按固原向在先朝號稱腹裏然制禦機宜惟先要害定邊花

